


太平寰宇記

二十七之三十四



		漢書門
二	二	
三	三	
四	四	
一	九	
二	三	
四	一	
冊	架	函
類	號	類

庫文閣內		
二	二	漢
九	三	
一	四	書
函	冊	
三	四	
架	號	類

內閣文庫	
番號	漢 2343
冊數	24 (5)
函號	291 25



太平寰宇記卷第二十七

關西道三

雍州三

興平 昭應 武功 乾祐

興平縣西九十里舊二本周犬邱之地也按漢地理志周

曰犬邱秦曰廢邱項羽封章邯為王都于此漢高帝改

為槐里今縣北故城是也武帝又割置茂陵縣以茂陵

在此邑昭帝又割其地置平陵縣以平陵之故也屬右

扶風魏黃初元年改為始平國因原以建名歷晉至符

堅移於茂陵城後魏永安元年移於今縣東北十五里

魏恭帝元年又移于縣東北二十五里大象二年復移



於今縣東南十五里文學城。隋大業九年，自文學城移于今所。唐景龍四年，車駕送金城公主至縣，因改為金城縣。置于馬嵬故城。即姚萇時扶風王駢以數千人保馬嵬故城。是此處也。至德二年，復為興平縣。尋又復為金城。今改為興平。渭水南去縣二十九里。○馬牧澤在縣東南二十里，南北廣四里，東西二十一里。○百頃澤在縣西二十五里，周迴十六里，多蒲魚之利。○始平原。三秦記云：長安城北有始平原，數百里，其人井汲巢居，井深可五十丈，即此原也。○犬邱城，一名槐里城，一名廢邱城，今在縣東南一十里。秦仲之子莊公伐西戎。

復其地為西垂大夫，即此。周懿王所都，項羽封章邯為雍王，都廢邱，亦此城。魏黃初元年，於故城置扶風郡。至晉太始中，郡徙理郿，改此城為始平國，領槐里縣。後魏真君七年，自此城徙槐里縣於今縣理西二十五里槐里故城。此城遂廢。○茂陵故城，在今縣東北十九里。漢武帝陵在槐里之茂鄉，因以為名。守陵溉樹掃除凡五千人。至宣帝始為縣。晉併入始平縣。後魏曾於此置始平郡。領始平縣。真君七年廢郡。莊帝永安元年，又移於今縣東北十五里始平故城。此城遂廢。○馬嵬故城，一名馬嵬，人名於此築城以避難，未詳何代人。唐天寶末，玄

宗西幸次馬嵬驛為禁軍不發殺楊妃於此復有端正
樹存焉劉禹錫經馬嵬坡詩綠野扶風道黃塵馬嵬驛
路邊楊貴人墳高三四尺乃問里中兒皆言幸蜀時軍家
誅佞倖天子捨妖姬群吏伏門屏貴人牽帝衣低徊轉
美目風日為無暉貴人飲金屑倏忽舜英暮平生服香丹
顏色真如故屬車塵已遠里巷來窺覷共愛宿粧妍君
王畫眉處履綦無復有履組光未滅不見巖畔人空見
綾波襪却童愛踪跡私手解盤結傳者千萬眼縷絕香
不歇指環照骨明首飾敵連城將入咸陽市猶得賈胡
驚○漢龍泉廟在縣東北二十四里武帝廟號也○漢黃

山宮在縣西南三十里武帝微行西至黃山宮即此也
○章邯臺在縣東南十里○漢公孫弘墓在縣東北十
八里○衛青墓在縣東北十九里起冢象廬山○霍去
病墓在縣東北一十九里起冢象祁連山○李夫人陵
在縣北一十六里俗謂之英陵○李延年墓在縣東北
一十八里董仲舒墓在縣東北二十里

昭應縣東五十八里舊縣即漢新豐之地本驪戎國晉獻
公伐驪戎是此地秦滅之為驪邑漢高帝七年以太上
皇思彭城之豐欲東歸於是高帝築此為新豐縣屬京
兆今縣東十二里故城即漢縣之所後漢靈帝未移安

定郡陰盤縣寄理於此城今亦謂之陰盤城後魏太和九年自此移陰盤縣於今昭應縣東三十二里冷水西戲水東司馬村故城也其新豐縣自陰盤縣寄理之後又移理于故城三十里蓋在零水側周閔帝元年又徙于天寶廢新豐縣東南七里隋大業六年又移于天寶中廢縣所治垂拱二年以新豐縣東南三十里有山踊出因改為慶山縣天授二年於縣界零口置鴻州取慶山渭南兩縣十二鄉於郭下置鴻門縣以慶山高陵櫟陽渭南五縣以隸焉至允視元年廢州并廢鴻門縣神龍元年復為新豐縣天寶末玄宗每歲十月幸溫湯歲

盡而歸以縣去湯泉稍遠四年廢新豐改為貴昌縣後以太宗昭陵之故數有應徵事宰臣稱賀至七載十二月改為昭應。驪山在縣東南二里即藍田山也溫湯出山下其陽多寶玉其陰多黃金三秦記始皇作閣道至驪山八十里人行橋上車行橋下今石柱猶存山上立祠名曰露臺。浮睇山水經注云蓋驪山之別麓而有異名也。鳳皇原後漢書延光二年鳳皇集新豐即此原也亦驪山之別麓。恨石在縣東十里初始皇之葬遠採此石將致之驪山在此不復動石高一丈八尺周迴十八步。坑儒谷在縣東南五里始皇以驪山

温處令人冬月種瓜。招天下儒者議之。各說不同。因發
机陷之。唐玄宗改為旌儒鄉。立旌儒廟。賈至為碑文。
鴻門坂。續漢書。沛公見項羽處。在縣一十七里。舊大道
北坂口。按閔中記。鴻門在始皇陵北十里。新豐縣。漢書
云。文帝登霸陵。指新豐路。示慎夫人曰。此是北走邯鄲
道也。又亭尉呵李廣處。温泉在驪山之西北。陵三秦
記云。入湯湏以三牲祭之。不爾即爛人肉。張衡賦序云。
余適驪山。觀温泉浴神井。嘉洪澤之普施。乃為之賦。今
按泉有三。其所即有皇堂石井。周武帝天和四年。大
冢宰于文護所造。隋文帝列樹松栢。唐開元十年。置温

泉宮於驪山。至天寶六年。改為華清宮。始移於岳南。又
造長生殿以祠神。玄宗歲常幸焉。杜牧過華清宮三絕
句云。長安迴望繡成堆。山頂千門次第開。一騎紅塵妃
子笑。無人知是荔枝來。又新豐綠樹起黃埃。數騎漁陽
探使回。霓裳一曲十峯上。舞破中原始下來。又萬國笙
歌醉太平。倚天樓殿月分明。雲中亂拍祿山舞。風過重
巒下笑聲。戲水在縣東二十七里。注水經云。冷水出
浮睇山。戲水出驪山鴻谷。又北歷戲亭東。即周章軍西
至戲。秦將軍卬拒破之。亦此地也。百丈水。即冷水之
別名。歷陰盤新豐兩原之間。北流于渭。陰盤故城。漢

舊縣屬安定。後遇亂，徙于此。屬京兆。寔後魏文帝太和九年，移此額於冷水西。戲水東以城之，是此也。步昌亭，三輔黃圖云：成帝于霸陵北步昌亭，起昌陵，即武帝之廢陵也。曲郵亭，張良追漢高祖處也。露臺祠，即始皇祠也。按辛氏三秦記云：驪山嶺有始皇祠，不齋戒而往，即風雨迷道。幽王城，一名幽王壘，國語：幽王滅于戲。史記：幽王以甲侯女為后，王愛褒姒之子伯服為太子，申侯怒，乃與犬戎共攻幽王，殺之，驪山之下虜褒姒，取周賂而去。潘岳西征賦曰：履犬戎之侵地，疾幽王之詭惑，舉為烽以沮衆，淫嬖褒而縱匿，軍敗戲水之上。

身死驪山之北，赫赫宗周滅為亡國。驪戎故城在縣東二十四里，殷周時驪戎國地也。新豐故城在縣東一十八里，漢新豐縣也。漢七年，高祖以太上皇思東歸於此，置縣，徙豐人以寔之，故曰新豐。并移粉榆舊社，街衢棟宇，一如舊制。士女老幼，各知其室，雖雞犬混放，亦識其家焉。周幽王陵在縣東北二十五里。秦始皇陵在縣東八里，始皇即位，治驪山陵，在徒七十萬，今按其陵高大，亦不足七十萬人積年之功，蓋以驪山水泉本北流者，皆陂障使東南流，又此山無石，取于渭北諸山，其費工力由此也。漢成帝陵，廢昌邑王陵，已上二陵。

俱在邑界。馮衍墓。後漢人在縣西四里。段太尉墓。在縣西十五里。即段秀寔也。

武功縣

西北一百四十里。舊十四鄉。今四鄉。

漢舊縣。古有郃國。堯封。後稷之

地。周平王東遷。以錫秦襄公。孝公作四十一縣。釐美陽。武功各其一也。釐與郃音同。字異。武功蓋在渭水南。今郃縣地是也。按舊縣境有武功山。斜谷水。亦曰武功水。故諸葛亮表云。遣孟琰據武功水。又杜彥達云。太白山南連武功山。則是縣本以水山立名也。唐武德三年。分雍州之武功。好畤。盩厔。扶風。郃。四縣。于今理。置稷州。因後稷所封為名。貞觀元年。廢州。以縣屬京兆。武后天授

二年。又為稷州。以奉天。始平。盩厔。好畤。等五縣屬焉。至大足元年。廢州。縣仍隸府。後唐同光中。割屬鳳翔。長興元年。却復京兆。三畤原在縣西南二十里。高五十丈。西入扶風縣界。敷物山。即華山之別名也。自華州陰縣。東接潼關。連亘經于是邑。莫谷水。注水。經云。莫谷水。南經美陽縣。與中亭川水相合。雍水。俗名別水。亦曰圍川水。西北自扶風界流入。釐城。一名武功城。在周為郃國。後稷所封之邑。漢為釐縣也。在今縣西南二十二里。後漢省。復自渭水南移武功縣。于釐故城。因謂之武功城。後魏孝文太和十一年。改武功為美陽縣。

仍于此置武功郡。周武天和四年，美陽還舊理。建德三年，省郡，別立武功縣，于中亭川，即今縣理也。晉地道記云：省虢，以併郿，蓋取虢之南境。渭之南，以併郿，非省縣也。唐武德三年，于此置稷州。貞觀元年廢。斜谷，其斜谷水出衙嶺山，北至郿入渭。周城一名美陽城。漢志：美陽縣西北中水鄉。周太王所居邑，即此也。詩云：古公亶父，來朝走馬，率西水滸，至于岐下。又曰：周原膴膴，萇荼如飴，爰契我龜，築室于茲。帝王世紀：周太王避狄，循漆水踰梁山，徙邑于岐山之陽。今扶風美陽西北有岐陽城，舊周地也。小槐里，李奇曰：即槐里之西城也。

東已有槐里城，以此城為小槐里。魏志：太祖以楊阜為武都太守，以武都孤遠，欲移之，人多戀土，然阜威信素著，前后徙人居京兆扶風，天水界者萬餘戶，于是徙郡于小槐里，百姓襁負隨之，此城也。六門堰，西魏文帝大統十三年置，六斗門節水，因名之。虢亭，后漢王恇除郿令之官，至虢亭，亭長曰：亭有鬼，數殺過客，不可宿也。恇曰：仁勝兇邪，德除不祥，何鬼之避？即入亭止宿。夜中聞有女子稱冤之聲，恇叱曰：有何枉狀，可前求理乎？女子曰：無衣，不敢進。恇便投衣與之，女子乃前訴曰：妾夫為陪令之官，過宿此亭，亭長無狀，枉殺妾家十餘口。

理在樓下。悉盜取財貨。牾問亭長姓名。女子曰。即今門下遊徼者也。牾曰。汝何故殺數人。殺過客。對曰。妾不過白日自訴。每夜陳寃。客輒眠不見。應不勝感恚。故殺之。牾曰。當為爾理此寃。勿被殺良善也。因解衣于地。忽然不見。明旦。召遊徼詰問。懼伏罪。即收繫。得同謀十餘人。悉伏罪。遣吏送其喪歸鄉里。于是亭遂清安。○美陽城。漢縣。在今縣西七里。南有周原。後魏太和十一年。移廢縣于古聚城中。後改武功為美陽縣。周天和四年。武功復還舊理。建德三年。省此邑。今縣餘址。迨盡。漢書注。岐山在美陽西北。○五泉渠。西自岐州扶風縣界流入。經三時原。

隋文塋此原上。水入城。國渠合。亦有六堰門。西魏大統十三年。築以節水。○后稷祠。在縣西南二十里。郊祀志。周興于邠邑。至今血食。○姜原祠。在縣西南二十里。關中記。姜原祠在邠城東。○隋文帝秦陵。在縣西南二十里。三時原上。○慶善宮。在縣南十八里。唐家舊宅。南臨渭水。武德元年。置宮。貞觀六年。鑾駕親幸。醮群臣。賦詩焉。○蘓許公墓。在縣西一十里。蘓村。神道碑存。

乾祐縣。西南三百五十里。舊三鄉。今四鄉。本漢洵陽縣地。唐通天二年。分

豐陽縣及招喻左綿等谷逃戶。以置安業縣。景龍三年。改屬雍州。景雲元年。復隸商州。乾元三年。改乾元縣。仍

屬京北府。尋又歸商州。漢乾祐二年，又屬京北，便以年
號名縣。○蘊谷在縣西南七里。

太平寰宇記卷第二十七

(Faint bleed-through text from the reverse side of the page)

太平寰宇記卷第二十八

關西道四

同州

沙苑監

同州

同州馮翊郡今馮翊縣禹貢雍州之域。春秋屬秦。戰國時為秦魏

二國之境。按漢史自高陵以東皆魏分。始皇平天下為內

史地。項羽為塞國。漢高帝初置河上郡。九年復罷。按其地

即漢臨晉縣地。臨晉故大荔國。秦獲之更名臨晉。景帝分

左右內史。此為左內史。武帝改為左馮翊。後漢因之。魏除

左字。但為馮翊郡。舊理在長安城內。太上皇廟西南。今失

所。又按魏略云。建安初。分馮翊為右內史。高陵東為左內史。是也。晉因之。後魏兼置西華州。按後漢書云。孝明帝分華山郡。置武山郡。西魏改華州為同州。以漆沮既從。澧水攸同。言二水至斯。同流入渭。以城居其地。因為州之名。在馮翊縣。而馮翊郡如故。按郡國記云。同州所理城。即後魏永平三年。刺史安定王元燮所築。其東城。正光五年。刺史穆弼築。西與大城通。其外城。大統元年。刺史王羅築。自今奉先縣東北五十里。李潤鎮。分秦州置華州。理於此。廢帝三年。又改為同州。其同城。蓋自後魏以後。修築。非漢之臨晉縣也。地志以為漢臨晉縣。未詳其事。蓋後漢

於此置臨晉縣。取今朝邑界。故臨晉城為名。晉改為大荔。後魏初。復名臨晉。孝文太和十一年。又改為華陰。至孝昌二年。以重名。又改為武鄉。仍屬武鄉郡。即撫寔也。隋開皇初。廢郡。煬帝初。州廢。復置馮翊郡。唐武德元年。改為同州。領馮翊。下邽。蒲城。朝邑。澄城。白水。邠陽。韓城。八縣。三年。分朝邑。置河濱縣。分邠陽。置河西縣。分澄城。置長寧縣。仍割河西。韓城。邠陽。三縣於河西。置西韓州。九年。分馮翊。置臨沮縣。貞觀元年。省河濱。臨沮。二縣。八年。省長寧縣。廢西韓州。以邠陽。河西。二縣來屬。垂拱元年。割下邽。屬華州。開元四年。割蒲城縣。屬京北府。天

寶元年改同州為馮翊郡。乾元元年復為同州。本匡國軍節度。梁改為忠武軍。後唐同光初復舊。周顯德六年改為刺史。皇朝改為定國軍節度。

元領縣七 今八

馮翊 郃陽 澄城 白水 韓城

朝邑 夏陽 蒲城 雍州割到

州境

東西一百八十五里 南北二百二十八里

四至八到

東至東京一千一百里

東至西京六百五十里

西至長安二百八十里

東至河東郡八十一里

南至華州七十八里

西至華州下邽縣八十九里

北至郃城縣二百四十二里

東南至華州華陰縣

西南至京兆府二百七十里

西北至京兆府同官縣九十里

東北至龍門縣一百六十六里

戶

唐開元戶五萬六千五百九十九

皇朝戶主二萬二千六百七十六客四千八百一十九河

東戶一百九十五

風俗

漢書地理志云濱南山近夏陽人俗質木不恥寇盜性剛毅而好勝敵

姓氏

馮翊郡出五姓 郭 盖 雷 党 吉

人物

蒼頡姓侯岡氏馮翊人黃帝史官造書契。嚴翰善春秋公羊鍾繇不好與繇答難翰曰故吏為明公服耳公羊未肯也

土產

皺文靴今貢 蒲合 麝香 鵲

石燉餅舊貢 草坐 白蒺藜

本草云防風生沙苑

馮翊縣舊三十四鄉今十一鄉本漢臨晉縣故大荔戎城秦獲之更名古戎國城在今州東三十七里朝邑縣界故王城是也舊說秦築高壘以臨晉國故曰臨晉晉武帝改為大

荔後魏改為華陰。後以名重，改為武鄉。隋大業三年，改為馮翊縣。馮輔也。翊，佐也。義取輔佐京師。渭、洛、河三水皆經郡界。九龍泉在縣東南八里，有九穴，同為一注。因名九龍。今謂之鷲鴨池。甘泉出置谷中，其水尤美。最堪造酒。高原在州北三十五里。水經注云：洛水南經高原西，俗謂許原也。洛水自西北澄城縣界流入，亦曰沮水。沙苑一名沙阜，在縣南十二里。酈道元水經注云：洛水東經沙阜北，其阜東西八十里，南北三十里，俗名之曰沙苑。即西魏文帝大統三年，周太祖為相國，與高歡戰於沙苑，大破之。其時太祖兵少，隱伏於

沙草之中，以奇勝之。後於兵立之處，人栽一樹，以表其功。今猶往往猶存。仍於戰處立忠武寺。今以其戰處宜六畜，置沙苑監。興德宮在縣南三十二里。唐義旗將趣京師，軍次於忠武園，因置亭子，名興德宮，屬家令寺。苦泉，按梁氏志云：在許原下，地有苦泉，水味鹽苦，羊飲之肥而肉美。今於泉側置羊牧，因相傳謂沙苑細肋羊。諺曰：苦泉羊，洛水漿。遺柳，西魏宇文泰敗高歡於沙苑，泰矜功，令騎士種柳各一株，數及七千。至今沙苑最多柳焉。重泉城，三秦記云：馮翊西北三十里有重泉城，即漢武帝為李夫人所築。龍首渠，史記云：臨晉人

穿渠得龍首，故名龍首渠。司馬遷祠，代父談，畢史記者。昔居於郡，今有祠在焉。

郟陽縣

東北一百二十里，舊十六鄉，今七鄉。

漢舊縣，屬左馮翊。按郡國志云：

今縣南二十里有城，即古莘國地也。散宜生為文王求有莘氏美女以獻紂，即此地。按應邵注云：有郟水之陽。詩大雅大明篇云：在洽之陽，即此也。水經注云：郟陽城南有漢水，東流於河，與剗首水相近。郡國縣道記云：郟陽城，魏文帝築，今縣南三里，故城是也。周武帝時屬澄城郡。隋開皇十六年，自故城移縣於今理。梁割隸河中府。後唐天成元年復舊。剗谷水，左傳：晉敗秦師于令

狐，至于狐首。杜註云：今狐在河東，當與瓠首相接。瓠首坑在郟陽也。○羈馬城，左傳：文公十二年，秦伯伐晉，取羈馬。又成公十三年，晉侯使呂相絕秦，曰：翦我羈馬，是此也。○太姒廟，周文王娶有莘之女太姒，即邑人。今郡有文母祠，存祀典。○故蒲城縣，唐開元中改為奉先縣，割入京兆府。

澄城縣

北一百里，舊十鄉，今九鄉。

本漢徵縣之地。帝昭云：徵音懲。徵

澄同聲。後人誤為澄。春秋文公十年，秦伐晉，取北徵，即此城是也。後魏太平真君七年，分郟陽縣，又於今縣理置澄城郡。隋開皇三年，罷郡，以屬同州。唐長慶四年，割

隸奉先縣以奉先陵梁割屬河中府後唐同光復舊
○溫泉水經注云名有三原奇川鴻馮西注于洛亦
曰帝營溫泉又有甘泉水出匱谷中其水尤美堪造酒
泉東至坊新里左氏傳僖公十八年梁伯益其國而不
能實也命曰新里秦取之即此也○徵城在今縣西南
二十二里即左氏文公十年秦伐晉取北徵是也漢以
為徵縣屬馮翊今俗名避難堡後漢省晉復置尋又省
○新城左氏傳文公四年晉侯伐秦圍祁新城即是此
地也○雲門谷水經注云雲門谷水源出澄城縣界○
王官城即秦邑名也廢城在縣西北又成公十三年晉

侯使呂相絕秦傳我王官翦我羈馬○乾坑漢書溝洫
志云武帝時嚴上言臨晉人願穿洛以溉重泉以東萬
餘頃於是發卒萬人穿渠自徵引洛水至商顏商顏今
在馬邑縣界名曰龍首渠按州西三十里有乾坑即龍
首之尾

白水縣西北一百一十里按史記秦文公分清水為白水
舊十七鄉今七鄉縣即此地也後廢在漢為粟邑縣粟邑故城在縣西北
二十八里漢薛宣為左馮翊以粟邑縣小僻在山中其
人謹朴以頻陽令薛恭換粟邑令尹賞二縣俱大理又
為漢衙縣地春秋時秦晉戰於彭衙是也後魏和平三

年分澄城郡於此置白水縣及白水郡南臨白水因以立名永平三年移郡於今縣西南三十五里奉先縣界隋閔皇三年罷郡以縣屬同州邑有會賓鄉唐長慶四年割隸奉先縣以奉先陵。沮水按酈道元水經注云洛水東南沮水入焉故洛水亦名漆沮水其境東南谷多白土因曰白水。柳谷水郡國縣道記云衙城側有柳谷水即彭衙水南流至縣理東北合洛水是也。姚谷魏書云姚谷屬白水。栗邑城漢縣在縣西北二十八里有故城存又云栗邑縣僻在山中其人謹朴薛宣為馮翊以頻陽令節恭換栗邑令尹賞兩縣皆大理。

彭衙故城在今縣東北六十里有古城左氏謂秦晉戰於彭衙即此也後漢安帝以上郡避羗寇寄理於此因省衙縣晉惠帝再置尋又省焉。

夏陽縣

東北百三十里舊十一鄉今六鄉

古有莘國漢卻陽縣地按梁氏

十道志云唐武德三年分卻陽於此置河西縣以在河之西為名又割同州之卻縣韓城二縣於今理置西韓州取古韓國為名也以河東有韓州故此加西貞觀八年廢西韓州以縣屬同州乾元三年改為夏陽縣。漢水惣名發源黃河西岸平地爾雅漢大出尾下郭璞注河東汾陰縣有水口如車輪濱沸涌出其深無限名為

漢魁馮翊郃陽復有亦如之相去數里而夾河中渚上
又有一漢水源皆潛相通○莘城系本及詩莘國妣姓
夏禹之後武王之母太妣即此國之女有家在焉○長
城魏惠王所築以備秦○劉仲晟漢高祖兄也封仲於
戊午年為匈奴所攻棄國而走廢為郃陽侯居此城也
○姚武壁十六國春秋苻堅二十一年慕容泓起屯兵
華澤堅遣子叡討之以龍驤將軍姚萇為司馬為泓所
敗叡死之萇使趙都謝罪堅殺之萇懼奔渭北西州豪
族率眾歸之推萇為監主萇乃僭號於此蓋以武功立
因名姚武壁

韓城縣東北二百里舊

十二鄉今五鄉古韓國及梁國漢為夏陽縣地今

縣西南三里有夏陽故城存韓國故城在今縣理南十
八里梁國在今縣理南二十二里有少梁故城隋文帝
分郃陽於此置韓城縣以古韓城為名梁割屬河中府
後唐天成元年復舊○梁山漢志注云梁山在夏陽西
北即尚書禹貢治梁及岐詩韓奕篇曰奕奕梁山爾雅
曰梁山晉望也注云謂晉國所望祭也故曰大梁別小
梁之號俱在韓城縣界大梁山在今縣西五里又按三
秦記梁山宮城又名織錦城○三周山注水經云三累
山層密三成俗因名三累爾雅所謂三山成為崑崙邱

○龍門山在縣北五十里。禹貢所謂導河積石，至於龍門。三秦記云：河津一名龍門，外懸泉而兩傍有山川，陸不通，魚鼈莫上，故江河大魚有暴鯁龍門之困。韓奕詩云：有倬其道，韓侯受命是也。按古今地名云：韓武子食采於韓原，亦秦晉戰於此，即獲杜回。又秦獲晉惠公以歸之處。○岷谷水在縣南一里，注於河。○少梁城亦春秋秦晉戰處也。○龍門關一謂龍門戍，極峻險。西魏文帝大統元年置在龍門山下，關口有龍門城，即戍所也。司馬彪注莊子云：呂梁即龍門也，在縣東北。○夏陽城，漢縣名，唐初廢縣，後復置，今在東北一百三十里。

高門原按水經注云：高門原南有層阜，秀出雲表，俗謂馬門原是也。○禹祠書云：禹治水至於龍門，今夏陽縣是也。禹巡遶至於遶山，即此，因有祠名。○子夏石室，孔子弟子為毛詩序，昔處於此，有石室存焉。

朝邑縣

東三十五里，舊二地，即古大荔戎國，在今縣東三十步，故王城是也。在漢為臨晉，故地。後魏文帝分置南

五泉縣。西魏廢帝三年改為朝邑縣。以北據朝坂為名。○朝坂按水經注云：洛水東南歷強梁原，俗所謂之朝坂。○臨晉城，史記魏文侯十六年伐秦所集，臨晉襄王六年與秦會，臨晉。史記武王元年與魏惠王會，臨晉，謂

此城也。故城在今縣西南。○懷德城，漢縣，在今縣西南三十二里。懷德故城是也。漢志注云：洛水東南入渭，今故城在渭水之北，沙苑之南。一名高陽城。○長春宮，在強梁原上。周武帝保定元年，宇文護所築，初名晉城。武帝建德二年，置長春宮。隋文帝開皇十二年，增構殿宇。煬帝大業十三年，高祖起義兵，自太原赴京師，九月，大軍濟河，舍於此宮，休甲養士，而西定京邑。自後凡牧此州，多帶長春宮使。○蒲津關，因蒲坂，又以河津之湊，因以為名。十六國春秋，苻堅皇始五年十月，大雨霖，河渭俱溢，蒲坂津監寇登，得大履於河中，長七尺三寸，人跡稱

之，指長尺餘，文深一寸，健見，嘆曰：履載之內，何所不有。○何橋，左氏傳，昭元年，秦后子出奔晉，造舟於河，杜預注云：造舟為梁，通秦晉道，即此橋。○西瀆大河祠，漢書地理志云：左馮翊臨晉縣有河水祠，郊祀志：祀河於臨晉，穆天子傳：陽紆之山，河伯馮夷之所都，是唯河宗氏。山海經：馮夷人面，乘兩龍，太公金匱：馮循龍魚河圖，河伯姓呂名公子，夫人姓馮，名夷，尚書中候：伯禹云：臣觀河伯面長，人頭魚身，張揖云：馮夷，河伯字也。華陰澧津，鄉隄，首陽里人也。水死，化為河伯。博物志：昔夏禹觀河，見長人魚身出水，曰：吾精，豈不為河伯也。馮夷者，華陰

人得道水仙化為河伯。豈同哉。抱朴子。河伯八月庚日。渡河溺死。天帝署為河伯。應劭曰。馮夷水仙也。西魏文帝大統十三年。於漢祠更加營造。因立西瀆祠於廟庭。周武天和四年。太宰宇文護於祠廟建碑一所。宣帝大象元年。江淮濟各從本所祠。唯有一祠。依舊不改。每歲發使。致璧加牲以祠焉。禮記云。先王之祭川也。皆先河而後海。今因河而祭海。即其義也。唐天寶十四年。封為靈源公。芮鄉郡國縣道記云。今縣西南二里。臨晉故城。是古芮鄉。又縣東一里。有王城。蓋大荔戎王之城。左氏傳云。晉陰貽生會泰伯於王城。即此也。通靈陂在

縣北四里二百三十步。唐開元初。姜師度為刺史。引洛水及堰黃河以灌之。種稻田二千餘頃。

蒲城縣

東南九十里。舊二鄉。今一十鄉。本漢重泉縣地。史謂秦簡公城

重泉。即今縣南五十里。有重泉故城也。今縣即後魏太和十一年。分白水縣於此。置南白水縣。以在白水之南為名。西魏廢帝三年。改白水縣為蒲城。以縣東故蒲城為稱。屬同州。唐開元四年十月。改為奉先縣。仍移隸京兆府。以奉睿宗橋陵。至十七年。昇為赤縣。皇朝開寶四年。改為蒲城縣。故重泉縣。後漢書云。王阜字代公。為重泉。適時大旱。收奪強吏。按察豪猾。於是澍雨。有鸞集。

縣屋。縣為雅樂。應聲而舞。旬日方去。而化感如此。洛水亦曰沮水。賈城古之賈國。左傳謂芮伯梁伯賈伯伐曲沃是也。五味酸改漢書宣帝紀常困於蓮芍鹵中。如淳曰。為人所困辱也。蓮芍縣有益池。縱廣十餘里。其鄉人名曰鹵中。服虔曰。鹵中。或曰澤中。孟康曰。蓮芍縣西北也。按漢蓮芍縣東南下邳縣界。此即鹵中也。塹洛。史記秦孝公九年築長城。簡公二年塹洛。故云自鄭濱洛。今沙苑長城是也。又按三秦記云。在蒲城東五十里。秦築長城。即是塹洛也。唐睿宗橋陵在縣西北三十里。豐山。玄宗泰陵在縣東北二十里。惠莊太子

陵在橋陵東南三里。惠宣太子陵在橋陵東六里。惠文太子陵在橋陵東三里。並在栢城內。憲宗景陵在縣西北二十里。僖宗靖陵在邑界去長安一百五十里。

沙苑監

沙苑監者。在同州馮翊朝邑兩縣界。按唐六典。掌牧養隴右諸牧羊牛。以洪其宴會祭祀及尚食所用。每歲典要。分月供之。若百司供應者。則四時皆供。凡羊毛及雜畜皮角。皆具數申送。所由馬。唐末廢。皇朝顯德二年。於苑內牧馬。在州南一十五里。

古跡

沙苑古城在朝邑縣南一十七里從馮翊縣東界沿洛水南岸入朝邑縣界及南至渭水其城廣四十八里

大沙 鴻鶴池 李公池 出白蒺藜

蔣黃

太平寰宇記卷第二十八

太平寰宇記卷第二十九

關中道五

華州

華陰郡今 禹貢雍州之域今州境兼有豫州之域周

禮職方氏云豫州其山鎮曰華山地理志華山古以為敦

物在華陰縣南在周時為畿內之國鄭桓公及所封采邑

一名咸林故國語曰鄭桓公為周司徒采地咸林也春秋

時為秦晉地左氏傳曰晉侯許奉秦伯以河外列城五南

及華山按華山記云此山分秦晉之境鄙晉之西則曰陰

晉邊秦之東則曰寧秦戰國時自高陵以東皆魏之分史

史記云魏築長城自鄭濱洛今州東南三里魏長城是也
按郭緣生述征記云長城或說秦晉分境祠華岳故築此
城秦并天下為內史之地兩漢及晉為京兆宏農二郡之
地按後魏書云太平真君元年置華山郡至孝明帝分華
山郡又置武山郡孝昌二年又改為東雍州仍領華山郡
以西有雍州故曰東雍至西魏廢帝三年改東雍為華州
今馮翊郡也隋開皇三年郡廢而華州如故大業二年省
華州其地屬京兆馮翊郡至義寧元年割京兆之鄭縣華
陰二縣置華山郡因後魏郡名武德二年改為華州割雍
州之渭南來屬五年渭南還雍州垂拱二年割同州之下

邽來屬二年改為太州避武后諱神龍元年復舊名天寶
元年改為華郡乾元元年復為華州寶曆中肅宗不豫
又為秦州寶應二年復為華州兼兼京城防禦使又為鎮
國軍節度梁為威化軍後唐同光元年改為鎮國軍周顯
德元年降為刺史皇朝升為鎮國軍節度

南至商元領縣三十里今四

東至鄭縣一百下邽華陰渭南京兆府

西至州境

東西一百四十三里南北一百三十五里

東至四至八到

東至東京約九百八十里
東至西京約六百一十里
西至長安一百五十里
東至陝州二百六十里
南至商州二百八十里
北至同州六十里
東南至魏州一百六十里
西南至金州一千八百里
東北至河中府一百五里
西北至耀州一百五十里

戶

唐開元戶三萬七百八十七
皇朝戶主一萬一百六十九客六千九百四十六

風俗

與長安同

姓氏

武功郡二姓 蘓 韓

始平郡四姓 馮 龐 陰 宣

人物

楊震宏農華陰人號閔西孔子曾孫彪難董卓不欲遷

都劉寬華陰人有人認寬牛下與之唐嚴挺之華州人為右丞子武劔南節度楊綰華州人為相十日天下望風而惧姚南仲下邳人多諫疏官至右僕射楊炯華陰人

土產

茯苓

茯神

細辛

今貢

綿

絹

朱柿出豐原鄉

董侯里

石踏爐出將相鄉獼猴谷此二物元貢今停

鶻採于金氏陂唐時貢五粧松一名乳毛松十二月採

出蒲谷元不貢

鄭縣

舊二十四鄉今九鄉

本荅舊縣漢屬京兆即鄭桓公封邑今郡

北故鄭城是其故城按郡國縣道記云古城連接今州

城齊天保中官路經其中東西相連有三小城至宇文朝縣移于西南九里故鄭城隋開皇三年又移理于州北故鄭城四年又移于廢華州城唐武德四年又自州城移于州東一里興元元年新築羅城其古鄭城並在羅城內仍移鄭縣于州西二里官路南周智先生祠邊即今縣是也。少華山在縣東南十里山海經曰太華之西八十里曰少華之山其木多荆杞其獸多牝牛其陰多磬石其陽多瑇瑁鳥多赤鷲爾雅云西南之美者有華山之金石焉。五部祠按水經云鄭縣城南山有五部神廟東南向華岳其廟前有碑後漢光和四年鄭縣令裴果字君光所立今

按碑文有石^碑樹谷御史大夫將軍收伯其廟中署有五
部者謂石堤西戎樹谷明神五委先生東臺御史王剪。
王喬谷俗謂太公谷即王喬所隱之處谷有喬祠堂歲常
祀之。英山在縣西南一百三十里山海經曰英山其上
多杻糧。竹水亦曰大赤水又名箭谷水注水經曰竹水
南出行山經媚加谷歷廣郡原北流注于渭。灌水一名
小赤水今名高谷水按山海經云出石腕山。孤栢原水
經云孤相原愚水出焉亦合灌水。沈水按漢書地理志
沈陽縣屬左馮翊注水經云沈水又北經沈城之西。聖
山在縣西南去州二十五里舊圖經云垂拱四年十一月飛土

掩谷為山擁水為池羣峯競起其月十二日忽踊四峯
高二百餘丈有白龜黃龍紫雲其山蓋地東西五百里
南北七里後立聖山廟。竹山在縣西南一百四十里
一千二百六十丈山海經云竹山其上多喬木其陰多
缺。細腰原在縣西南一十六里原中狹因名之。符
禹山在縣西南一百里高一百丈山海經云其陽多銅
其陰多鉄菊禹之水出焉北注于渭。沈陽故城在州
東北十五里驛路南石橋東有沈陽城按此城與故武
城二縣並後漢省按漢京兆尹渭南郡所管諸縣多在
渭水之南北二縣並是馮翊屬縣據三輔地界言之皆

合在渭北甯在同州及高陵涇陽之北界蓋因後漢安
順間西羌擾亂關中縣人移于渭水南鄭縣界權修壁
壘以居年代綿遠因而稱為漢縣焉

下邽縣

東北隔渭水八十里
舊二十八鄉今七鄉

本秦舊縣地漢書地理志下

邽屬京兆尹以邽戎之人而來為此縣秦有上邽此故
加下也魏志曰董卓遷都長安華歆求出欲為下邽令
即此邑後魏改邽為封以下為夏避道武帝諱也隋開
皇三年以夏封縣屬華州十七年屬同州置在雄霸故
城大業二年復舊名按四夷縣道記云下邽縣東南二
十五里有下邽古城在渭水之北即大業十一年自此

城移入西魏廢延壽郡城即今縣理是也唐垂拱元年
十二月自同州來屬。故甘泉城在縣東南四十里以
此地水多鹹苦城中井泉美遂名甘泉亦謂之夏王城
俗傳赫連勃勃所築。廢下邽縣城在縣東南三十五
里地志云秦下邽縣也自漢及晉不改魏初移于雄霸
城注水經云渭水注下邽故城南即此也。古蓮勺城
在今縣北二十二里蓮音輦勺音酌以草為名晉地道記云
蓮勺縣屬馮翊後秦姚萇廢後魏太和三年改馮翊為
延壽郡蓮勺縣仍舊隋開皇十年置郡以蓮勺屬華州
今縣城是也大業二年省蓮勺入下邽漢張禹自河內

徙家於此城也。金氏陂在縣東南二十里。按輿地志云漢昭帝時車騎將軍金日磾有功賜其地。摯虞三輔決錄云金氏本下邳州也。今陂久廢。即渠西廢陂是也。唐武德二年引白渠入陂。復曰金氏陵。貞觀三年陂側置金氏監。十二年此監廢。其田賜王公。古云此陂水滿即閤內豐熟。西又有金氏陂。俗號曰東陂。南有月陂。形似月也。亦名金氏陵。○金日磾家在縣城內東南三百步。高二丈。年多不見墳闕。地勢猶存。史記金翁叔名日磾。丁黎切以匈奴休屠音除王太子泛渾邪王將眾五萬降漢。位至將軍。賜田于此。歸葬因家焉。非下邳人也。○翟

公冢在縣東三十五里。高九尺。漢廷尉翟公之冢。○萬壽渦在縣南四十里。古來此渦。或興霧起雲。時有牛馬猪羊變見形。伏遊沙渚。還入其渦。村坊往往見之。今乾無水。○六石人元在縣東南七里。同在一處。前趙石勒所造。置在石人村。西魏入閤。遂移石人于府門外。經宿還歸本處。往往夜行。晝則在本處。今縣東南十五里有二枚。縣東北一里有二枚。東南七里有二枚。村人禱祭。

華陰縣。東六十里。舊二鄉。今七鄉。尚書禹貢曰。稷河積石。南至于華陰。戰國屬魏。為陰晉地。今縣東南五里有古城。即是六

國時陰晉地也。魏納于秦，秦得改為寧秦。漢書高帝八年更寧秦為華陰縣。以太華山之陰，故名之。隋大業五年移于今理。唐龍朔三年廢潼津縣入華陰。聖歷中為太陰縣。寶應二年復舊。太華山在縣南八里。山海經云：太華之削成而四方者，其高五千仞，廣十里。鳥獸莫居，有蛇焉。名肥蠶，六足四翼，見則天下大旱。遠而望之，有若華狀。故名華山。按名山記云：華岳有三峯，直上數千仞，基廣而峯峻，疊秀迄于嶺表，有如削成。今博山香爐形，定象之。又華山與首陽本一山，河神巨靈擘開，以足踏離其

下，分為兩山，以通河流。故掌與腳跡存焉。曹植述征賦云：表神掌於岩首。又張衡西京賦云：綴以二華。巨靈^負高掌，遠躡以流河曲。厥跡猶存。又水經云：華山頂上靈泉，曰蒲池。又按華山記云：頂有池，生千葉蓮，服之羽化。因名華山。白虎通云：西方華山，少陰用事，萬物生華。故曰華山。以西有少華，故曰太華。昔有太元真人茅盈，內記始皇三十年九月庚子，盈曾祖父象於華山乘雲駕龍，白日昇天。先是時邑人謠曰：神仙得者茅初成，駕龍上昇入太清。時下元洲戲赤城，繼業而往在戎盈。帝若學之臘嘉平，漢武內傳魯生女長樂人，初餌胡麻及

朮絕穀八十餘年。少壯色如桃花。一日與知故人別入
華山。後五十年先識者逢生女于廟前。乘白鹿。從王女
人因識之。謝其親里。鄉故而去。神仙傳。中山衛叔卿嘗
乘雲車。駕白鹿。見漢武將臣之叔卿。不言而去。武帝悔
求得其子度世。令還。追其父度世。登華岳。見父與數人
博于石上。勅度世令還。詩含神霧。華山上有明星玉女。
手持玉漿。得服之則仙矣。○集靈宮。○存神殿。○望仙
臺。○集仙宮。○望仙觀。皆漢帝宮觀名也。漢書云。華陰
縣有集靈宮。三輔皇圖云。望仙觀在華陰縣。餘出華山
記。及三輔故事。又華山記云。宏農鄭紹。八月晚入華山。

見童子執五絲囊。盛栢葉露。食之。○石鼓。華山記云。北
有石鼓。左太冲西京賦云。神鉦迫遞于高崗是也。○南
北二廟。北廟有古碑九所。其一是漢鎮遠將軍段熲更
修之碑。黃門侍郎張昶書。魏文帝與鍾繇各于碑陰刻
二十字。此碑垂名海內。南廟是華北君祠。今有北君靈
臺。上仙下仙四神童院。其廟外栢樹二千餘株。即後周
文帝所植。○潼關有潼水焉。按三輔記云。關因水得名。
水去關一里。即左傳云。晉侯使唐嘉守桃林之塞。是此
按今潼關。是自函谷至于潼關。高出雲表。幽邃谷秘。邃
深林茂。木白日成昏。又云。潼關本名衝關。河水自龍門

衝激至華山東故以名也信神明之奧區帝宅之戶牖
有百二之固又按今閼即隋大業七年移于南北鎮城
門坑檻谷以置去舊閼四里餘至唐朝天授二年移近
內北臨河為路元宗開元十二年于華岳祠南通衢立
碑御製其文并書即此是新閼南路也舊路在岳北是
後牧是州者多帶防禦潼關軍使○瓊岳宮在縣西十
八里隋大業四年置本名敷水宮五年改為華陰宮義
寧二年移宮置長監貞觀六年改為華陰宮嗣慶三年
為瓊岳宮今廢○雲觀臺在縣南山下六里圖經云為
嶮峻難登先置下方于山下天寶元年勅于熊牢嶺置

中方號曰太清宮○松果山在縣東南二十七里山海
經云華山首曰錢來山其上多銅有鳥名曰鵙渠狀如
山雞黑身赤足與松果山相連○餘糧山在縣西南三
十里鄴道元注水經云餘水出糧餘山○渭谷水在縣
東四十五里注水經云南自松果山北入黃河神靈異
經云馮夷者恒農華陰潼鄉人也食水八石得仙○王
猛冢在縣東八十里按晉書云猛北海人家貧鬻菘于
洛陽與華陰神遇苻堅之時為僕射卒葬華陰唐貞觀
十一年致祭禁樵牧○車箱谷一名車水洞在縣西南
二十五里去敷水谷七里深不可測祈雨者以石投之

其中有一鳥飛出應時獲雨。好女泉在永豐源下其水微細。鎬泉在縣東十九里其水或涌或止深不可測。括地圖云是河眼亦謂之鎬池。敷西城郭緣生述征記云敷西縣夷狄所置謂符堅姚萇時有敷西縣尋省之在縣西南。定城郭緣生述征紀云或云段煨所造未詳。夾道各一城城下有泥泉水出焉。按煨在漢為鎮遠將軍後魏孝武帝永熙三年于城中置定城驛。平舒城史記云秦始皇三十六年秋使者從關東夜過華陰平舒道有人持璧遮使者曰為我遺鎬池君春秋後傳華山君托書致鄒池君子云過鄒池見大梓下有

文石取以款叩梓當有應者以書與之書入謹聲言祖龍死按注水經云渭水有東經平舒城北昔秦始皇之將亡江神返璧於華陰平舒道即此是也在縣西南。長城在今縣西二里即春秋時秦晉分界處。楊震墓按三輔故事云震改葬華陰潼亭先塋十餘日有鳥高丈餘集喪前悲鳴葬畢始飛去時人刻石象鳥立於墓前與符秦丞相王猛墓相近二冢並在今潼關西道北有楊震碑見存周文帝破東魏軍殺大將竇泰於此貞觀十一年太宗因幸墓所傷其忠赤非命親為文以祭之。漕河唐天寶三載以韋堅為左常侍兼陝州刺史

開漕河自苑西引渭水因古渠自華陰入渭運永豐及龍門倉米以給京師名曰廣運潭以堅為天下轉運使灞澇亦會於渠天寶中每年運米二百五十萬石後以漸損大歷之後終可及四十萬石也。永豐倉在今縣東北四十里即韋堅所置在渭水南號渭渠。廢潼津縣唐則天割仙掌縣置屬魏州蓋因潼川為名按潼水名灌水潘岳西征賦云沂黃卷以濟潼是也按唐歷云聖歷二年割魏州潼津縣入太州神龍三年廢。巨靈廟在縣北一百二里

渭南縣西三十五里舊十九鄉今八鄉本漢新豐縣地蓋符堅新置漢初

有渭南郡因以取名郭緣生述征記云渭南縣夷狄所置則謂符姚也後魏孝昌三年於今縣東四里明光原上置渭南郡及南新豐縣西魏廢帝三年改南新豐為渭南縣周建德二年省郡以縣屬京兆府開皇十四年自明光原移於今理周顯德三年自京兆割隸華州。三門水按溝洫志云秦始皇引渭水貫都以象天漢。新豐原一名青原注水經云冷水歷陰盤新豐三原之間是也又郡國縣道記云渭水在縣北十四里漕河在縣北一里。鳳凰原三秦記云新豐界有鳳凰原以鳳集得名。半日村此村山高蔽虧陽影常照其一半。

風門三秦記云風門在新豐縣東南而阜相對其所多
風。倒獸山一名元象山在縣東南五十里十六國春
秋曰王昭字子年隱于東陽谷鑿穴而居弟子受業者
百人亦皆穴處石季龍兵亂棄其徒衆遷於倒獸山即
此山也。隋崇業故宮在縣東十五里。步壽宮三朝
黃圖步壽宮在新豐縣水經注首水經秦步壽宮西。
步高宮三輔黃圖步高宮在新豐縣水經注首水經秦
步高宮亦名市邱城。首水出縣西南石樓山北經二
宮通渭之東陽谷水而合渭。

太平寰宇記卷第二十九

太平寰宇記卷第三十

關西道六

鳳翔府

司竹監

鳳翔府

鳳翔府

扶風郡理
天興縣

禹貢雍州之域春秋及戰國時為秦都

秦德公初居雍即今天興縣也至獻公始徙櫟陽始皇併
天下屬內史項羽封章邯為雍王亦此地高帝更名中地
郡復為內史景帝初分屬右內史武帝太初元年更名右
扶風所以扶助京師行風化也與京兆尹左馮翊謂之三

輔理皆在城中。後漢出理槐里。即今興平縣東南七里。故槐里城是。魏文帝除右字。但為扶風郡。亦是重鎮。曹公使張命卻屯陳倉。建興中。諸葛亮攻陳倉。及郿。皆不克。晉太康八年。為秦國。後魏太武于今州理東五里。築雍城鎮。文帝改鎮為岐州。隋開皇元年。于州城內置岐陽宮。岐州移于今理。大業三年。罷州。為扶風郡。唐武德元年。復為岐州。領雍。陳倉。郿。岐山。鳳泉。等六縣。又割雍等三縣。置圍川。屬稷州。貞觀元年。廢稷州。以圍川及郿郡之麟遊。普潤。等三縣來屬。七年。又置岐陽縣。八年。改圍川為扶風縣。省虢縣。及鳳泉。天授二年。復置虢縣。天寶元年。改為扶風郡。至

德二載^年肅宗自順化郡幸扶風。置天興縣。改雍縣為鳳翔縣。並治郭下。初以陳倉為鳳翔縣。乃改為寶鷄縣。其年十月。復兩京。十二月。置鳳翔府。號為西^京。與成都^京。北^京。河南。太原。為五京。寶應元年。併鳳翔縣入天興縣。後罷京名。

元領縣九 今十

天興 扶風 郿縣 岐山 普潤 寶鷄
虢縣 麟遊 盩厔 京北府割到 崇信 新置

一縣舊廢

岐陽 入岐山扶風

州境

東西一百八十三里

南北三百八十九里

四至八到

東至東京一千五百八十里

東至西京一千一百七十里

東至長安三百一十九里

南取太白山路至興元府六百里

西至隴州一百五十里

北至涇州二百六十里

東南至京兆府界一百七十五里

西南至鳳州二百四十里

西北至涇州三百里

東北至邠州二百二十里

戶

唐開元戶四萬四千五百三十二

皇朝管戶主二萬六千七百九十客一萬三千三百一十

五

風俗

天水隴西迫近戎狄修習戰備高上氣力以射獵為先六
郡良家子選給羽門林期門以才力為官名將多出焉故
曰山西出將秦詩謂王子興師修我甲兵與子偕行此定

遺風又曰在其板屋乃山多林木人獲居之

姓氏

扶風郡六姓 馬 竇 班 輔 魯 惠

人物

白起郿人 春秋時有蹇叔 孟明 公孫枝 子車奄
息 漢屯來有班彪子超 傅毅 馬融 馬援 郭伋
扶風茂陵人 馬樞扶風郿人梁邵陵王綸引為學士覽
二萬卷書乃嘆曰吾聞貴爵位者以巢由為桎梏愛山林
者以伊呂為管庫 王世充天興人本姓支西域胡種代
居白鹿原其父收幼卒隨母嫁霸城王粲遂冒姓王氏

唐元載 楊炎 李淳風皆岐州人

土產

龍鬚席貢 蠟燭貢 麻布 松布 胡桃

天興縣舊十六鄉今十四鄉本秦雍縣秦國地也漢縣屬右扶風四

面積高曰雍又四望不見四方故謂之雍秦回中宮在

縣西漢文帝十四年匈奴入蕭關燒回宮中候騎至雍

即此也唐至德二年分置鳳翔縣永泰元年廢乃改雍

縣為天興縣○吳嶽秦都咸陽謂之西嶽○三時原史

記封禪書曰秦文公作鄜時宣公作密時靈公又作吳

陽上時在此原故號三時原也亦謂之周原○乾歸故

城在縣西南四十二里十六國春秋曰苻登太初三年乞伏乾歸西據西苑川號為西秦因築此城也。五水沂渭岐漆雍已上五水皆歷郡界。雍水在縣北二里源出縣西北平地水經注雍水歷中牢溪俗號中牢水亦曰氷井水。野人塢在縣南一百八十步秦穆王公失駿馬野人盜食之處也。漢五帝時。祈年宮漢書地理志祈年宮秦惠公起又有祈年觀。回中宮史記秦始皇二十九年巡隴西北地出筭頭山遇回中漢書文帝十四年匈奴入蕭關殺都尉燒回中宮侯騎至雍武帝元狩四年幸雍通回中道遂北出蕭關又有三良

宮相近。故長安城漢惠帝所築今在天興縣城西北苑中也。石鼓文在縣南二十許里石形如鼓其數有十蓋紀周宣王畋獵之事其文即史籀之迹唐貞觀中吏部侍郎蘓勗紀其事云虞褚歐陽共稱古妙雖歲久訛缺然遺迹尚有可觀而歷代紀地理志者不存紀錄尤可歎惜

扶風縣東百里舊十鄉今十七鄉本漢美陽縣地今京北府武功縣北美陽故城是也後周天和元年於北置燕州隋開皇十六年於今政陽縣置岐山縣以屬燕州隋末廢州唐武德三年分岐山縣於圍川城置圍川縣四年隸稷州貞

觀元年廢稷州來屬至八年改為扶風縣又按說文云圍川字作漳近代訛舛故為圍。三時原在縣南二十里。漳水在縣南三十里。白水在縣南二百步。雍水在縣東一百步。

郿縣

東南一百里今依舊十鄉

本秦縣也漢志郿屬右扶風三輔黃圖

云右輔都尉理所秦寧公徙居平陽即此地今縣十五里渭水北故郡城是也後魏廢帝因縣內郿城故為郿城縣至天和三年以郿城縣併入周城縣隋開皇三年廢岐山縣郡以周城縣屬岐州十八年改周城縣為渭賓縣大業二年復郿縣唐武德三年移縣於邠州城即

今理也白起此縣人。縣理城亦曰斜城城南當斜谷因為斜口斜谷南口曰褒北口曰斜。終南山在縣南三十里。郿塢在縣東北十六里董卓封郿侯據北阜築塢高七十丈號曰萬歲塢亦曰董卓塢以寫長安城形。太白山在縣東南五十里辛氏三秦紀云太白山在武功縣南去長安三百里不知高幾許俗云武功太白去天三百山下軍行不得鳴鼓角鳴則暴風疾雨立至周地圖記云太白山上恒積雪無草木半山有橫雲如瀑布則澍雨人常以為候驗之如離畢焉故語曰南山瀑布非朝即暮魏畧曰吉茂蕪遇亂隱于扶風南太

白中以經籍自娛。按唐史元宗天寶八年太白山人李
渾上言有神人言金星洞內有玉版石紀聖皇福壽之
符命御史中丞王鉞入山求獲之上御勤政樓受焉於
是大赦天下封太白山神為神應公四時祭祀金星洞
改為嘉祥洞。積石原在縣西北二十五里注水經云
積石原即此原也。魏青龍二年諸葛亮出斜谷與司馬
懿屯渭南郭淮等亮必登北原遂先據之亮至果不得
上即此原也。○五丈原在縣西南二十三里魏氏春秋
諸葛亮據渭南司馬宣王謂諸將曰亮若出武功依山
東轉是其勇也若西上五丈原諸君無事矣亮果屯此

原與懿相拒。渭水經縣東南。成國渠在縣東北九
里至上林入蒙籠渠溝洫志云關中有成國渠如淳注
云成國渠在陳倉也。○斜谷按唐書永貞元年西川節
度使劉闢反先是鳳翔斜谷路館驛停廢今宜却置命
高崇文為神策行營節度使崇文領兵馬取鳳翔斜谷
路李元奕領兵取駝谷同赴梓川應接當秦惠王時用
司馬錯之策以伐蜀漢光武使吳漢伐公孫述魏司馬
文王使鄧艾伐鄭劉禪晉穆帝使桓溫伐李子仁宋武
帝使朱齡石伐譙縱梁武帝使鄧元起伐劉季連周太
祖使尉遲迥平蕭紀隋文帝使景睿平王謙唐憲宗命

崇文平劉闢自秦至元和九度伐蜀四為水軍沂江而上惟秦與鄧艾尉遲迥梁睿唐及崇文五在斜谷駱谷出師南討不庭矣。○斜水出斜谷歷邑界東入渭。○斜城在渭水南一里周武帝天和元年築置雲州於此建德三年廢唐武德元年又於此置邠州三年又廢故此城存。○武功故城在今縣東四十里即鳳泉故縣北渭水之南注云渭水東經武功故縣北南對太白山北隔渭水與武功故城對。

岐山縣

東五十里舊十鄉今十四鄉

周太公從於岐即此地本漢雍縣之地後周天和四年割涇州鶉觚縣之南界置三龍縣

屬岐州隋開皇十六年移山龍縣於岐山南十里改為岐山縣屬州不改因山為名大業九年移於今縣東北八里唐武德元年移理於今岐陽縣界張堡壘七年移理龍尾城貞觀八年又移理豬驛南今縣理是也。○岐山在縣東北十里亦名天柱山禹貢曰棗汧及岐河圖括地象云岐山在崑崙山東南為地乳上多白金周之興也鷲鷲於山上時人亦謂此山為鳳凰堆酈元注水經云天柱山有鳳凰祠或云其峯高峻迥出諸山狀若柱因以為名。○渭水在縣南三十里經邑界。○姜泉皇甫謐帝王世紀云炎帝神農氏母有嬌氏女登為少典

妃遊華陽感神而生炎帝長于姜水因以氏焉酈元注
水經云炎帝長于姜水即此水也。終南山東連巨入
京北府界。廢岐陽縣在州東一百里亦漢杜陽之地
屬右扶風隋開皇十六年移三龍縣於此因改為岐山
縣唐貞觀十七年割岐山扶風二縣之土以置此地蓋
在岐山之陽因以為名元和三年二月以其地復入岐
山扶風二縣此額已廢。五將山在縣西北六十里十
六國春秋曰苻堅為慕容冲所逼長安謠曰帝出五將
久長得先是又謠曰堅入五將山長得堅大信之率騎
數百出五將宣告州郡期以孟冬拔長安堅至五將山

姚長遣吳忠圍之堅衆散忠執堅以歸新平即此山也

○漳谷水源出縣東北六里漳谷也南流入扶風縣界

寶鷄縣

西南九十里舊四鄉今十鄉

漢書地理志陳倉縣屬右扶風三

國志云在魏為重鎮太和二年蜀將諸葛亮攻圍郝昭
守之不拔即此城也又周地圖記云陳倉縣晉末廢苻
姚時於縣界置宛川縣後魏大統十六年移宛川縣入
漢陳倉故城後為陳倉縣即今縣東二十里古城是也
屬武都郡後周天和三年又於此置顯州建德三年又
廢顯州及陳倉隋開皇十八年又置陳倉縣屬岐州大
業十年移縣理於渭水北留谷城今縣是也唐至德二

載^羊改為寶鷄縣。以秦文公獲若石於此。以徵為名。今猶有寶鷄祠存焉。咸通三年。於縣東南開渠引渭水入昇原渠。通船楫至京。故城即長安城。漢惠帝所築。在今天興縣之西北苑中也。○陳倉山在縣南十里。辛氏三秦記云。太白山南有陳倉山。山上有石。與鷄山不別。趙高燒山。山鷄飛去。而石鷄不去。晨鳴山頭。聲聞三十里。或謂是王鷄。錄異傳云。秦文公時。雍南山有梓樹。文公伐之。輒有大風雨。樹生合不斷。有一人夜往山中。聞有鬼語。樹神曰。秦若使人被髮。以朱絲繞樹。伐汝。汝得不憂否。樹神不語。明日人語文公。如其言伐樹。斷其中。有一

青牛出走。入鄠水中。復出。使騎擊之不勝。騎墮地。復上。鬣解牛畏之不出。故置鬣頭。因此也。○渭水。○沂水。皆歷縣界。○箕谷水源出縣東南箕谷。○陳倉故城在今縣東二十里。即秦文公所築。魏畧云。太和中。魏遣將軍郝昭築陳倉城。適訖。會諸葛亮來攻。亮本聞陳倉城惡。及至。怪其整頓。聞知昭在其中。大驚愕。亮素聞昭在西。有威名。念攻之不易。初。太原靳詳少與昭相見。親後為蜀所得。及亮圍陳倉。詳為亮監軍。使於城外呼昭喻之。昭於樓上應詳曰。魏家科法。卿所練也。我之為人。卿所知也。曩時高剛守祁山。坐不專意。雖終得全。於今諂議。

不止我必死矣。卿還謝諸葛亮，便可攻也。詳以告亮。亮
進兵，雲梯衝車，晝夜攻距二十餘日，亮無利。會費曜等
救至，亮乃引去。按本城有上下二城相連，上城是秦文
公築，下城是郝昭築。○三交故城在縣西四十六里者，
舊傳司馬宣王與諸葛亮相距于此，因築此城。十六國
苻健于此置武都郡。○大散關在縣西南五十二里，老
子著書版，或云在函谷。按郡國志云：岐陽大山，一本大
作太無山嶺通褒斜大路。○寶鷄祠，漢書郊祀志云：秦文公獲
若石於陳倉北阪，今有神祠是也。○王女祠，秦穆公女
弄玉鳳臺之地也。○秦穆公陵在此。

麟遊縣

東北一百一十里，舊十一鄉，今四鄉。

本漢杜陽之地，隋義寧元年，唐

高祖輔政于仁壽宮，置鳳棲郡及麟遊縣。二年，改鳳栖
為雲臺，縣屬麟遊郡，仍割安定郡之鶉觚縣同來屬。唐
武德元年，罷州郡，以麟遊郡為麟州，領縣不改。貞觀元
年，廢麟州，以所管晉潤麟遊二縣屬岐州。六年，以縣自
宮城移于今所。○崔模嶺在縣東北五十里。○大橫水
在縣東南流入。○九成宮在縣西一里，本附仁壽宮。隋
文帝置。按隋書：開皇十三年，楊素於岐山北建仁壽宮，
夷山堙谷，館宇相屬，督役嚴悉，作者多死。高祖不悅，及
幸新宮，遊觀方喜。後帝歲暮日晚，登仁壽殿，周望原隰。

見宮外烽火彌漫人聞哭聲令左右觀之報曰鬼哭上
曰此即後死之鬼歲暮思歸耳取酒奠之乃止義寧元
年廢宮置立郡縣貞觀五年復舊宮以為避暑之所改
名九成宮。永安宮在縣西三十里唐貞觀八年置

普潤縣

北七十里舊
十鄉今四鄉

本漢安定鶉觚二縣之地在漢又為

漆縣并有鉄官今城西有漆水復有小城蓋置鉄官之
處也隋大業元年於細川谷置普潤縣以屬岐州蓋以
杜漆岐三水灌溉田疇民獲利濟以為縣名十三年移
於今理貞觀十一年改屬隴右經畧使今屬鳳翔。細
川谷水在縣南北流入涇州界。杜水源出縣東南溪

澗間。漆水源出縣東南漆溪按許慎說文曰漆水出
右扶風杜陽岐山東入渭也。岐水即大壘水也源出
縣東南流入漆水即古岐水是也。漢杜陽縣城郡國
縣道記云杜陽晉省在今鳳翔府北九十里普潤縣東
南界已失其所在。文王故城按郡國縣道記云隴州
吳山縣東四十五里即岐山縣之西南界有一故城彼
人謂之文王城按周文王都鄆不合於此更有城其誠
恐是漢杜陽縣又岐山縣東十九里有杜陽谷內亦有
一杜陽故城二縣俱在扶風郡界若據十三州志云郡
道里數即隴州杜陽故城近之據漢志注云杜水南入

渭即普潤縣文王城近之

魏縣

南四十里舊四鄉今六鄉

古魏國之地即周文王弟魏叔所封是

曰西魏按禮記注謂魏或謂郭在武都南一百里有魏城是也又按地理志云魏漢併于雍今魏縣後魏立為武都郡大統十三年遷同州洛邑縣人于武都城西置洛邑縣遷取舊名後周天和中又於洛邑置翔州尋廢州移州原郡理之隋開皇三年廢郡以縣屬岐州大業三年改洛邑為魏縣唐貞觀七年廢至天授二年復置○桃魏二城史記云秦武公滅魏為縣謂之小魏今魏西有二城相去十里今纜分餘趾城之所居俗謂之桃

魏川有路通漢中漢志注云魏宮秦宣太后起其二城一為魏國一為魏宮○磻溪神祠酈元注水經云磻溪中泉也即太公釣所石壁深高幽篁邃密林障秀阻人跡罕交東南隅有石室蓋太公所居水次平石釣處即太公垂釣之所其水清冷神異北流十二里注于渭也○周源史記封禪書云秦文公作廊時秦靈公作吳陽上時宣公作密下時是三時也時止也神靈所止處○廢清水縣漢縣本屬秦州按唐書州郡志錄鳳翔府元無此邑即知是秦州之屬邑獨續會要云天寶末陷于蕃中至大中三年鳳翔節度李玘奏七月二十五日收

復至秦州東北一百二十五里。即與隴城接界。故屬鳳翔府。尋廢。

盩厔縣

東南二百里。依舊十七鄉。

本漢舊縣也。武帝置。屬右扶風。山曲

曰盩。水曲曰厔。因山水之曲以名之。後漢省。晉武復立。魏因之。後周太和二年。乃移于今鄂縣西北三十五里。又割終雍州之終南郡於此。置恒州。領周南郡。建德三年。從鄂縣西北移於今所置周南郡。唐武德二年。廢恒州。天寶中。改為宜壽。後又為盩厔。後唐同光元年。割屬鳳翔。○漳水在今縣北五里。○隋宜壽宮在縣東南三十二里。○秦長楊宮在縣東南三十三里。中有射熊觀。

漢武帝好自擊熊羆。司馬相如從至上林。上疏諫。楊雄作長楊賦。○秦五柞宮在縣東南三十八里。漢武後元二年。幸盩厔五柞宮。帝崩于五柞宮。張晏注以宮有五柞樹。因以名。西京雜記五柞樹皆連三抱。上枝覆蔭數畝。水經注長楊五柞二宮相去八里。○青梧觀在五柞中。西京雜記觀前三梧桐樹。○望仙澤在縣東五十里。中有龍尾堆。雍州記云望仙澤在盩厔縣東南。周地圖記云望仙宮南澤中有石盩龍。兩所鱗甲動。有雲氣如鐘鳴。○讀書臺在縣東北三十七里。後漢馬融讀書之所。○姜維嶺本名沉嶺。在縣西五十里。蜀後主延

熙二十年大將軍姜維率衆出駱谷經沉嶺即此。司竹園在今縣東一十二里穆天子西征至地乃植之竹是此故史記曰渭川千里竹漢謂鄂杜竹林故有司竹都尉其園周迴百里以供國用義寧元年義師起高祖第三女平陽公主舉兵于司竹園號娘子軍。駱谷關在縣西南一百二十里唐武德七年開駱道以通梁州在今關北九里貞觀四年移于今所。駱谷道漢魏舊道也南通蜀漢魏少帝正始四年曹爽伐蜀諸軍入駱谷三百餘里不得前牛馬驢騾以轉運死畧盡少帝甘露二年蜀將姜維出駱谷軍于長城即此谷道也按

此道近代廢塞唐武德七年復開東北自鄂縣界西南經縣又西南入駱谷出駱谷入洋州興勢縣界。樓觀在縣東三十二里晉惠帝時置其地舊有尹先生樓因名樓觀唐武德初改名宗聖觀。老子廟華陽子錄記秦始皇好神仙於尹先生樓南立老子廟即此也晉惠帝元康五年重修更葺蒔木萬株南北連亘七里給戶三百供灑掃隋文帝開皇元年復修建堂宇。老子陵鄴元注水經云就水北經大陵西世謂之老子陵昔李耳為周柱下史以時衰適西戎於此有冢事非經證然莊子著書云老子死秦失三瓊是非不死有冢可也。

終南故城郡國記云唐武德二年於漢蓋屋故城置終

南縣八年廢因名為終南城

崇信縣西北二百二十五里五鄉本唐神策軍之地後改為崇信軍

皇朝建隆四年以崇信暨赤城東西兩鎮及永信鎮等

四處於此合為崇信縣

司竹監

按唐六典掌植養園竹之事其管內及百司所須

簾籠筐篚之屬擇其材幹以供之其笋以時供尚食歲終

以竹功多少為考課又按漢官有司竹長丞魏晉河內淇

園竹各置司守之官江左省後魏有司竹都尉北齊後周

俱闕隋有司竹監及丞唐因之在京兆鄂蓋屋懷州河

內今 皇朝惟有蓋屋一監屬鳳翔

太平寰宇記卷三十一

關西道七

東西一百 耀州 南北一百八十里

乾州

耀州

耀州華原郡本雍州之域在秦為北地郡泥陽富平隸屬

焉後為華原縣漢魏至唐皆為畿甸唐末李茂貞據鳳翔

借行墨制建制耀州仍為義勝軍節度使割同州美原為

鼎州以為屬郡温韜為節度使梁貞明元年韜降梁乃改

耀州為宗州義勝軍為精勝軍又改鼎州為裕州依舊以

温韜為節度使後唐同光元年改為耀州順義軍并割雍州之富平三原雲陽同官美原以屬焉三年降為團練州周顯德中降為刺史皇朝陞為感德軍節度

領縣六

華原 富平 三原

雲陽 同官 美原

州境

東西一百九十里 南北一百八十里

四至八到

正東偏南至東京一千二百里

正東偏南至西京八百里

正南至長安一百六十里

東至同州一百八十里

西至汾州三水縣界一百二十里

南至永興軍一百六十里

北至坊州一百八十里 東至華州一百八十里

西南至永興軍涇陽縣界六十七里

東北至坊州宜君縣界八十三里

西北至邠州一百八十里

戶

舊戶載雍州

皇朝戶主一萬九千八百零六一百八

風俗

同雍州

人物

唐李靖本京兆三原人

田遊巖

韓瑗並三原人

柳公綽華原人弟公權

土產

柏板出雲陽縣

啗馬藥

出同官

芍藥

石脂

青石華原出

華原縣四鄉本漢役祠縣地屬左馮翊曹魏元魏皆于其地

置北地郡元魏廢帝三年改為通州郡領泥陽縣隋開皇三年罷郡以縣屬宜州六年改泥陽為華原大業二年省宜州縣屬京兆唐垂拱元年改為永安縣天授二年又置宜州大足元年廢神龍元年復為華原縣後唐同光初于此置耀州縣屬焉。土門山在縣東南四里水經注云宜水南出土門山西。役祠故城在縣東北一里漢縣也宣帝神雀二年鳳凰集役祠是也。漢步壽宮在縣東北三里漢宣帝于役祠鳳凰集處得玉寶乃起步壽宮焉。漆水自東北同官縣界來經邑界。沮水自邠州入縣界合漆水入富平石川河。清水谷

在縣西三十五里。十道志云：即鬼谷先生所居也。水自雲陽界來。姚萇殿在縣西北十七里。晉書：萇事苻堅為龍驤將軍，從堅子叡討慕容泓，為泓所敗，叡死，堅怒。萇懼，奔謂此，自稱大單于，秦王此殿即萇之所造也。

富平縣

東南五十里，四十鄉，今十鄉。

本漢舊縣，屬北地郡。前漢理在今

靈州迴樂縣界。後漢移于今寧州彭原縣界。晉又移于今縣西南懷德城。後魏大統五年，自懷德城移于今理。周閔帝二年，于縣理置中華郡。隋廢郡，縣屬雍州。唐開元中，又移于義亭城，蓋古之鄉亭也。後唐同光初，割屬耀州。荆山，今古掘陵原。尚書禹貢曰：荆岐既旅。又曰：

導沂及岐。至于荆山。孔注：荆在岐山東，非荆州之荆山也。漢志：懷德縣禹貢此條。荆山在南下，其疆梁原。帝王代紀：禹鑄鼎于荆山。在馮翊懷德之地。有荆山。今其山下有荆溪。漆沮水，其下亦名石川水。西北自宜州華原縣界流入。尚書禹貢曰：導渭水，東至于漆沮。一名洛水，出馮翊北。懷德故城在今縣西南十一里，非漢懷德縣也。蓋後漢末及三國時，因漢舊名，于此立縣為名。今有廢城存。直市，按三秦記云：直市在富平西南十五里，即秦文公所創，物無二價，故以直市為名。天乳山在縣西北二十五里，兩峰相對，類于乳形。北雷川

在縣北五里。八公塢在縣東南二十五里。其塢兩畔各有小谷，象公字，中心有堆，因以為名。又有萬戶塢、黃金塢。雨金堡在縣東南三十里，有一泊，每有天雨水流入，似金色，俗呼雨金堡。鹹泉在縣東南五里。鄭白二渠在縣南二十里。西魏文帝陵、後魏武帝陵、二陵俱在縣東南二十五里。後周太祖文帝陵在縣西北一十三里。唐中宗定陵在縣西北一十五里。龍泉山。唐代宗元陵在縣西北二十五里。橫山。唐順宗豐陵在縣西北二十五里。甕金山。唐文宗章陵在縣西北二十里。唐懿宗簡陵在縣西北四十五里。鄧

愍太子陵在縣西北十五里。王剪墓在縣東二十七里。薄昭墓在縣西十三里。薄太后之弟封軹侯。李弼墓在縣西四十里。頽魯公為碑。重耳塚在縣東三十里。馬司放墓在縣西二十五里。章即長史降項羽，封為塞王。

三原縣。正南五十里，二鄉，今十四。本漢池陽地，始因符堅于截薛山北，置三原護軍，以地南有鄂原，西有孟侯原，北有白鹿原，是為三原。後魏太平真君七年，罷三原護軍，置三原縣，屬北地郡。明帝孝昌三年，蕭寶夤逆亂，毛洪賓立義柵捍賊。永安元年，于此置北雍州，俗呼為洪賓柵，其故

城在縣北五十里。五又割北地郡之三原縣于此置建忠麗以旌其功。隋開皇三年罷麗以縣屬雍州。後唐割屬耀州。天齊原在縣西北二十五里。西連截薛山。堯門山則縣西北三十二里。截薛山南自雲陽縣界連亘事載在彼縣。清谷水在縣西北華陽縣界流入一名鬼谷。晉蘇張師事鬼谷先生學即此鬼也。大白渠在縣南一里。黃白城在縣西南十五里。後漢李傕輔政天子東遷三輔飢歛乃移保黃白城即此地。秦曲梁宮在縣西南十五里黃白城內。永安故城亦名洪賓柵在縣北五十五里。即後魏北雍州城是也。周地

圖記明帝孝昌三年蕭寶夤逆亂闕右洪賓立義柵以捍賊永安元年于此置北雍州以洪賓為刺史故俗呼為洪賓柵其年又割北地麗之三原縣于此置建忠麗屬北雍州。又按後魏書毛遐洪賓兄也亦有功于魏故肅宗詔曰改三原縣為建中麗以旌其兄弟功也。孝武帝永熙元年移北雍州于今宜州仍于城中置永安鎮。唐高祖猷陵在縣東一十八里。唐武宗端陵在縣東十里。唐景宗莊陵在縣西北五里。唐永康陵在縣北二十八里。于謹墓在縣北一十八里。

雲陽縣西南七十里。本漢舊縣亦為美陽縣地古有雲

十一鄉今七鄉

陽宮即秦謂之林光宮漢謂之甘泉宮是也亦是匈奴
金人祭天之所按漢書地理志云昭帝立此縣屬左馮
翊後漢末省縣西北八十里故城即漢理也魏志曰司
馬宣王撫慰關中罷縣置撫夷護軍及趙王倫鎮長安
復罷護軍後氐羗反又立護軍劉石符姚因之後魏罷
護軍更于今理別置雲陽縣隋因之唐武德元年分雲
陽縣置石門縣三年于石門縣置泉州其雲陽縣仍于
南十五里水衝城以安之貞觀元年廢泉州改石門
縣為雲陽縣改雲陽縣為池陽縣至八年廢雲陽縣入
池陽仍改池陽為雲陽武后垂拱二年改為永安縣天

授二年以雲陽置鼎州以三原涇陽醴泉等四縣屬焉
久視元年廢州縣仍隸府焉神龍初復舊為雲陽縣後
唐同光初割屬耀州○截嶽山在縣東北十里一名慈
峨山俗名嵯峨山王褒雲陽宮記東有慈峨山今土人
嵯峨山頂上有雲起即雨里人以為候昔黃帝鑄鼎于
此山○甘泉山一名石鼓原俗名磨石嶺閩中記云甘
泉宮在甘泉山上按漢書云單于烽火候以應甘泉即此
山也又有甘泉水經縣之北○中山史記云漢武帝獲
寶鼎于汾陰迎寶鼎至甘泉從行上薦之至中山晏溫
有黃雲蓋焉徐廣云閩中山有中山非冀州者也王褒

雲陽宮記云宮南二十里有仲山未詳古之仲山山有竹箭生焉俗傳高祖兄仲所居今山有仲子廟積旱祈之圍此射獵則風雨暴至廟有一泉未嘗水竭。鄭泉在縣西四十里雲陽宮記漢鄭朴字子真隱于谷口高節不屈耕于石之下時人因子真所居名其所為鄭泉。金泉王褒雲陽宮記泉有數穴清澈無底按雍州記云有人飲此泉水見金色後山照水中往取得金焉故有此名。五龍谷泉注水經五龍水出雲陽宮西南。涇水水經注云涇水東流歷峽謂之涇峽。冶雲谷雲宮記治拾雲陽宮八十里封禪書所謂谷是也其一

山出鉄冶鑄之所因以為名入谷便洪潦沸騰飛泉激射兩峰皆峭壁孤豎盤橫坑谷凜然凝沍常如八九月中朱明盛暑當晝暫暄涼秋晚候緼袍不暖所謂寒門者也又云入冶谷二十里有一槐樹樹北有泉名曰金泉今按此樹猶存在金泉西南百步谷中今有毛原監雲陽宮史記秦始皇二十七年作甘泉前殿築甬道自咸陽屬之閔中記林光宮一曰甘泉秦所造在今池陽縣西北故甘泉山上周圍十餘里三輔黃圖云甘泉宮漢武帝建元中增廣之周十九里漢儀注曰甘泉宮去長安二百里望見長安城黃帝已來圜立祭天處

開山圖曰雲陽先生之墟也中有神書鉄券玉石之記
又曰武帝于甘泉宮更置前殿始廣諸宮室有芝生甘
泉邊房中漢舊儀又云芝有九莖金色綠葉朱實夜有
光乃作芝房之歌三輔黃圖曰漢武帝起紫殿雕文刻
鏤蔽以玉飾之成帝永始四年行幸甘泉郊泰畤神光
降于紫殿今按甘泉北有槐樹在故宮之南今謂玉樹根幹盤峙雲
陽宮記甘泉宮北有槐樹今謂玉樹根幹盤峙三二百
年木也者舊相傳咸以為此樹即楊雄甘泉賦所謂玉
樹青葱者也○梨園雲陽宮記車箱坂下有梨園一項
樹數百株青翠繁密望之如車蓋○通天臺史記武帝

元封二年公孫卿言于帝曰仙人好樓居帝乃使卿持
節候人作通天臺漢舊儀云通天臺高三十丈望雲雨
悉在其下去長安城三百里望見長安城武帝祭天上
通天臺舞八歲童女二百人置祠具招仙人祭天已令
人升通天臺以候天仙天神既下祭所若大流星乃舉
烽火而就竹宮望拜漢儀注上有承露仙人掌擎玉盃
承雲表之露元鳳間臺自毀椽桷皆化為龍鳳隨風雨
飛去西京賦云通天眇以竦峙百常而董擢上辨華徑
以交紛下刻峭其若削○鄭國渠按秦始皇元年韓聞秦
好興事欲疲之乃使水工鄭國間說令鑿涇水自仲山

西抵瓠口為渠並北山東注洛三百餘里欲以溉田中
作而秦覺秦欲殺國國曰始臣為間然渠成亦秦之利
也秦以為然卒使就渠成溉烏鹵之地四萬餘頃收皆
畝一鍾閔中無凶年命為鄭國渠後至武帝元鼎六年
一百三十六歲倪寬為左內使又奏請穿六輔渠以益
以益溉鄭渠旁高印之田後十六歲趙中大夫白公又
奏穿涇水注渭中溉田四千五百餘頃人得其饒而歌
之唐永徽六年雍州長史孫祥奏言往日鄭白渠溉田
四萬餘頃今為富商大賈競造碾磑止溉一萬餘頃于
是高宗令分檢渠上碾磑皆毀撤之未幾所毀皆復廣

^德二年李吉甫先父文獻公為工部侍郎復陳其弊代宗
亦命文獻拆去私碾磑七百餘所歲餘文獻出牧常州
私制如初至大曆中水利所及總六千二百餘頃太
白渠漢溝洫志武帝大始二年趙中大夫白公奏穿渠
引涇水首起谷口尾入櫟陽注渭中袤二百里溉田四
千五百餘頃因名曰白渠民得其饒。徑路神祠漢志
雲陽縣有休屠金人徑路神祠三所音義云匈奴祭天
處本雲陽甘泉山下秦奪其地後徙休屠古地郊祀志
徑路神祠祭休屠王也。鈞弋陵武帝鈞弋趙婕妤昭
帝母也昭帝即位追尊為皇太后發卒二萬人起陽陵

邑三千戶。列仙傳：鈞弋夫人，齊人，姓趙，少好飲酒，病臥六年，右手拳，飲食少，望氣者云：東北有貴人，推而得之。言到，姿色甚佳。武帝披其手，得玉鈞，而手尋展，遂生。昭帝後，武帝害之，及殯，尸香一月。昭帝即位，更葬之，棺空，但有絲履。雲陽記：鈞弋夫人，後至甘泉而卒，尸香聞十餘里。葬雲陽，武帝思之，為起通靈臺于甘泉宮。有一青鳥集臺上，往來，至宣帝時乃止。漢武帝廟在縣西北一百里。唐宣宗貞陵在縣西北四十里。唐德宗宗陵在縣北一十五里。嵯峨山。李陵母冢在縣西北一十五里。古石蛇在縣西北四十里。流金泊在縣東

北十里

同官縣 東北五十里 舊六鄉 今四鄉 本漢役祠 上音他 枯反 下音虛 羽反 縣地屬左

馮翊。晉為頻陽地。苻堅于役祠城東北，銅官川置銅官護軍。後魏太平真君七年罷軍，為銅官縣，屬北地郡。後周除金，作此同字，屬宜州。隋大業二年省宜州縣，屬雍州。唐貞觀初，又屬宜州。十七年州廢，還京兆府。後唐割屬耀州。白馬山在縣西北。銅官川在縣北五十里。注水經云：銅官水出役祠縣東北，西南經銅官川，謂之銅官水。女華夫人祠在縣北三十里。女華山上，其山高峰秀出，每有大風雷，多從華嶽至此。故老傳曰：華嶽

女君在此山上因立祠每水旱祈禱有驗焉

美原縣

正東七十里舊十鄉今四鄉

秦漢頻陽縣地舊縣在今縣南三

里故城是也因界內頻山取名屬左馮翊本秦屬公置

符秦時置土門護軍後魏太平真君七年割入同官縣

景明元年分同官縣置土門縣因頻山有二土門扶如

門故曰門大業二年省義寧二年再置貞觀十七年

又省咸亨二年復置仍改為美原縣即今理後唐割屬

耀州。頻山在今縣西北十一里秦厲公于此山之南

置頻陽縣秦之將王翦即此縣人也。獲鼎按漢書宣

帝時扶風美陽縣民得鼎獻之下有司議多以宜薦見

宗廟如元鼎時故事京兆尹張敞議今鼎出周都之地

有刻書曰王命尸臣官此栒邑賜尔旂鸞黻珣戈尸

臣拜手對揚景命以臣詳之即周賜大臣之鼎不足以

見宗廟制曰京兆尹議當。頻陽故城今今縣南三里

漢為縣後魏省今廢城存。義林旌義二鄉唐元和三

年勅割隸富平縣以奉豐陵。玉女山在縣西三十五

里。明月山在縣西北二十里

乾州

乾州

今理奉天縣

本京兆奉天縣唐末李茂貞建為乾州乾寧

中以覃王出鎮建為威勝軍割奉天好時武功蓋屋醴

泉等五縣以隸焉。至莊宗同光年中，改為刺史屬鳳翔。其功武醴泉二縣還京北府，蓋屋入鳳翔，只領奉天。好時二縣至明宗天成三年，又割好時還京北府，只領奉天一縣。乾德二年，割好時永壽二縣屬焉。

領縣三

奉天 好時 永壽

州境

東西八十九里

南北一百四十里

四至八到

東至東京一十四百五十里

東至西京一千三百里 東至長安一百八十里

西至鳳翔一百八十里 南至武功五十里

北至邠州一百五十里

東南至永興軍興平縣七十里

西北至鳳翔府一百一十里

西南至永興軍武功縣五十里

東北至永興軍醴泉縣七十里

戶

舊戶載京北府

皇朝管戶主七千三百六十九，客一千七百五十六。

風俗

同長安

土產 元無

奉天縣

四十九鄉
今六鄉

本漢醴泉縣地唐光宅元年以高宗乾

陵在縣西北十三里武后分醴泉始平好畤武功新平

罷之永壽五縣及永壽之地以置此額奉天陵寢屬京兆府

因名奉天至建中初有術士桑道茂請城奉天後朱泚

反果駕幸焉興元元年升為赤縣乾寧中置乾州于此

今為郭下縣。莫谷水在州西北從永壽縣麻亭額流

入至縣界西南入武功。甘泉水在州東北從永壽

縣温秀嶺流至縣界却入醴泉合涇河。乾陵唐高宗

皇帝與則天同一陵在州西北五里。靖陵唐僖宗皇

帝陵在州東北一十里與乾陵相接隔豹谷。陸賈墓

在州東北二十里岑陽甘東兩鄉河西原。妲己墓在

州西五里莫谷河西半涯坡內。好畤故城在州東岑

陽鄉一十五里。五味坡在邑界。梁山即禹貢云壺

口治梁及岐又古公亶父踰梁山至于岐下及秦立梁

山宮皆此山也

好畤縣

西北三十五里
舊七鄉今三鄉

本漢舊縣時者神明所依止也自

古以雍州積高神明之隲故立好畤以郊上帝諸神祠

皆聚焉。後漢省。故縣在今縣東南四十三里。奉天縣界。好時故城是也。晉元康中。復于漢好時縣城東南二里。再置好時縣。周建德二年。併入莫西縣。隋開皇十八年。又改莫西為好時縣。大業三年。省。唐武德二年。分醴泉縣置。因漢舊名。屬雍州。三年。改屬積州。貞觀元年。廢。積州仍舊。二十一年。移于廢上宜縣置。即今理也。其上宜縣。隋開皇十八年。間廢。後周同光年中。割好時縣屬鳳翔。長興元年。却還京兆。皇朝乾四年。割屬乾州。梁山。史記周本紀曰。古公亶父。與其私屬。去邠。渡漆沮。踰梁山。至于岐下。即此是也。岐下。秦有盜穆公駿馬者。

于此而食。穆公飲之酒。與野人鳩相接。梁山宮。史記秦始皇三十五年。幸梁山宮。即此也。莫谷水。經縣界。蘇武冢。在縣東三十里。今里名守節焉。武亭河。自鳳翔麟遊縣界。流過當縣。入武功界。石門山。在縣西。美川鄉。一十五里。明月山。在縣西一十五里。與鳳翔扶風縣分界。永壽縣。西六十里。舊十鄉。今六鄉。蓋豳國之地。公劉之居。漢為漆縣地。後魏大統十四年。于今縣北廣壽原上。至廣壽縣。周大象元年。改為永壽。隋開皇三年。省入新平。唐武德二年。又分新平縣南界。于今縣北永壽原西。置縣。因原立。

名屬邠州四年又南移于應封地置貞觀二年又南移于今理神龍三年割屬京北府景龍元年復屬邠州興元元年又南移于順義店置皇朝乾德二年割屬乾州○高泉山在今縣北三十里酈元注水經云甘泉即高泉山也○溫修山一名溫秀山開山圖云溫修山實三陽山也謂之溫秀蓋習俗訛耳○永壽原舊名廣壽原避隋煬帝諱改為永壽原在縣西南○莫谷水源出高泉山名安陽泉南流歷莫谷改名莫谷水後魏于水西置縣因名莫西縣也○莫幽故城後魏時木所築在縣北據山其東西南三面險絕實控禦之地○齊南故

城齊南即姚興將名也屯軍築壘在今縣西其南西北三面一如南幽之險○莫營關後魏所置在縣西南○涇水自新平縣界流入○醴泉苑在縣東北十里并宮並周所立後廢唐貞觀四年置醴泉監兼置屯五所隸司農寺

太平寰宇記第三十一

校勘

耀州 總序

在秦為北地郡泥富宜陽平隸焉

按泥陽富平漢屬北地郡泥陽今定平縣屬邠州富平今屬耀州耀州今治華原乃漢左馮翊之役初縣今云耀州在秦為北地郡泥陽富平隸焉多差舛未合

雲陽縣 總序

按漢書地理志云昭帝立此縣屬左馮翊後漢末省

按前漢地理志雲陽縣非昭帝置後漢亦不省
唯左馮翊有雲陵縣昭帝置後漢罷國志無之
今記誤以雲陵為雲陽也

縣志云云校未合

之野所編今云縣北云秦北此強云則當平
惟富平今屬縣北此強云則今之平州縣也

林氏謂富平縣北此強云則今之平州縣也
其秦北此強宜出平縣也

縣志云云

林氏

太平寰宇記卷三十二

關西道八關此至新宗杜高本漢軍明更以封秦

一緡四平隴州惟野口南由來風天寶亦平名高氏謂

緡東張風涇州亦平野高謂此以南由緡置舍世南由

帝二平隴州以風緡村八林風張義寧二年天下無野置

隴州理涇陽周為岐隴之地春秋時屬秦國文公曾都

於此今隴南三里汧水南故汧城是也秦併天下屬內史

漢為汧縣屬右扶風自魏至晉亦然永嘉後廢魏初于今

汧原縣界置隴東郡今州即隴東郡故郡也孝明正光三

年分涇州岐州之地兼置東秦州于故汧城領隴東安夷

汧縣三郡。至孝昌二年為萬俟醜奴所破。孝武永熙元年于今州東南八里。復置東秦州。仍于州所理置汧陰縣。西魏大統十七年改東秦州為隴州。因山為名。周明帝二年移州于今所。武帝天和五年省入岐州。宣帝大象二年復置。隋開皇五年改汧陰為汧源縣。仍廢郡而隴州如故。煬帝二年州廢。以屬縣併入扶風郡。義寧二年又于縣理置隴東郡。唐武德元年復為隴州。以南由縣置舍州。領南由一縣。四年廢舍州。復以南由來屬。天寶元年改為汧陽郡。乾元元年復為隴州。至德宗并為奉義軍節度。以柱事臯殺朱泚偽使之故也。今為防禦州。

元領縣五

今四

汧原

汧陽

吳山

隴安新置

二縣廢

華亭入汧原

南田入吳山

州境

東西二百里

南北四百五十九里

東南至四至八到

東至東京一千七百五十里

東至西京一千三百二十五里

東至長安四百六十五里 東至鳳翔府一百五十九里

南至鳳州山路四百三十六里
西至秦中州三百四十里
西南至秦州界一百一十里
東南至鳳翔府界一百六十里
西北至原州界一百八十里
東北至涇州一百六十里

唐開元戶六千八百五

皇朝管戶一萬九百七十一客八千六百六

風俗

與鳳翔小異尤類秦川

唐段秀實汧陽人以笏擊朱泚德宗贈太尉

土產

龍鬚席 鸚鵡 山丹 雉尾 羊 馬

絨

汧陽縣今七八鄉漢汧縣之地屬右扶風晉地道記云汧縣

屬秦國故城在今縣南漢置隴關西當戎翟今名大震
關在今縣西後魏廢帝改為汧陰縣周明帝移州併縣
于今理隋改為汧源縣唐元和三年併華亭縣入隴

山在縣西六十二里。說文隴山天水大坂也。辛氏三秦記引俗歌云隴頭流水鳴聲幽咽。遙望秦州肝腸斷絕。又云震關遙望秦川如帶。酈元注水經云一水出汧縣西山謂之小隴山巖嶂高峻不通軌轍。故張衡四愁詩有云我所思兮在漢陽。欲往從之壘坂長。周地圖記云其山高處可容百餘家。三秦記隴謂西關也。其坂九圍不知高幾許。欲上者七日乃得越絕。高處可容百餘家。下處容十萬戶。山頂有泉清水四注東望秦川如四五里人上隴者想還故鄉悲思而歌有絕死者。又秦川記登隴東望秦川四五百里極目泯然墟宇桑梓與雲霞

一色其上有縣溜吐于山中匯為澄潭名曰萬石潭流溢散下皆注于渭山東人行役登此而顧瞻者莫不悲思其歌云隴頭水兮離四下念我行役飄然曠野登高遠望涕零雙墮是此也。汧山在縣西六十里禹貢導汧及岐至于荆山。魚龍川酈道元注水經云有一水出汧縣西山入謂之小隴山其水東北流歷澗注以成淵出五色魚俗以為靈而莫敢採捕因謂是水為魚龍水自下亦通謂之魚龍川。弦蒲菽周禮職方氏雍州其澤菽曰弦蒲。晉太康地志云汧縣在蒲谷鄉弦中谷乃雍州之蒲也。按漢書地理志雍州有弦蒲菽。汧水

周禮職方氏雍州其川涇汭。○大震關在縣西六十一里。後周武帝天和元年置。今為隴山關。漢武帝至此遇雷震。因名。○張女郎祠。故老相傳云。漢張魯女死于此。時人為立祠。民禱有驗。○秦城在州東二十五里。秦非子養馬汧渭之間有功。周孝王命為大夫。○郁夷故城。漢為縣。後漢省。按漢志註云。郁夷有汧水祠。又詩云。四牡騤。周道倭遲。韓詩作郁夷字。蓋在今州西五十里。大寧關側。近汧水源。今驗諸處。因水置祠。多在源下。又自關上隴。盤紆屈曲。逶迤而進。與縣名相符。晉太康中。曾于此置隴關縣。又地道記云。郁夷省併郿。蓋因王莽

之亂。郁夷之人。權寄理郿。因併于郿。○廢華亭縣。在州西北一百里。本漢涇陽縣地。今原州平涼縣界。涇陽故城是也。後魏為長地縣。隋大業元年于此置華亭縣。在白馬華亭三川口。蓋因水為名。三年改為亭水縣。屬安邦郡。唐元和三年三月廢入汧源縣。○小隴山在廢縣西四十里。水經注。芮水出小隴山。其川名汭。○秦王廟。秦穆西征至此。迴軍因之立廟。

汧陽縣。東八十里。八鄉。本漢隴麋縣地。以縣東八里隴麋澤為名。屬右扶風。闡澤縣道記云。隴麋縣因原以為名。今縣東古城是漢理之所。晉省。後周天和五年于此置縣。

西四十里馬牢故城置汧陽縣及汧陽郡以在汧山之
陽為名尋廢郡以縣屬隴州建德四年移于今理。汧
水經縣南一里。段太尉冢在縣西北四十里善萬鄉
黑草僻川西。秦王鑄劍爐在縣東南二十里石上有
人馬踪跡又有秦王馬跡泉在義節鄉。真珠泉在三
泉鄉縣西四十五里。

吳山縣

東南一百一十里
旧二鄉今一鄉

漢麋隃縣地後魏孝昌二年于

今南由畧長蛇川長蛇縣屬東秦州隋開皇十三年自
長蛇川故地移于今縣十八年改長蛇縣為吳山縣取
縣西吳山以稱邑唐元和三年併南由縣入。吳山在

古縣西南五十里周禮雍州其山鎮曰嶽山孫炎曰雍
州鎮有吳嶽山也郭璞曰吳嶽別名開山漢志吳山在
汧縣西古文以為汧山國語謂之西吳秦都咸陽以為
西嶽注水經云汧水發南山西側俗以為此山為吳山
三峯霞舉霄秀雲天崩巒傾返山頂相捍望之恒有白
勢山下石穴廣四尺高七尺水溢石空懸波側注崩澗
震盪發源成川北注于汧。龍盤山在縣東南七里。
涇水經縣南東流。白環谷注水經云南由縣有白環
水源出白環谷。廢南由縣在州西南一百二十里在
今縣東南十里漢之汧縣地也後魏明帝孝昌年于縣

西南由谷口置縣因谷為名。隋開皇三年屬岐州。唐貞觀四年割入隴州。元和三年併入吳山縣。故安夷關在廢縣西一百四十六里。長蛇川在廢縣西一百步。渭水在廢縣南四十里。

隴安縣去州八十里本縣由鎮即古南由縣之地。國朝

開寶二年割汧陽縣之四鄉于隴州界置隴安縣。後轉運使李守信之所奏也。秦嶺山在縣西南過渭河接鳳川界。西秦山在縣北二十里。山內有秦王試劍崖。渭河在縣西南四十五里。自秦州隴城縣流入。馬頰社在孝感鄉。社內有古時鑄錢監基。汾山有溪出九

菖蒲十里

南北一百三十五里

涇州

涇州保安縣今禹貢雍州之域。春秋時屬秦。秦始皇併天下屬北地郡。漢武帝又分北地郡置安定郡。故漢書云以六郡良家子補羽林郎。安定即六郡之一。宋永初山川記云安定昆戎壤也。其郡在今原州高平縣。後漢永初五年徙其人于美陽以避羌寇。郡寄理美陽。即今雍州武功界。美陽故城是也。永建四年移于今所。按晉太康地記云安定郡領臨涇朝那烏氏鶉孤陰密西川六縣。屬雍州。魏晉亦為安定郡。及魏神麈三年于此置涇州。蓋因涇水為其

名隋大業三年改為安定郡大業末金城賊帥薛舉侵擾
幽涇唐武德元年太宗西討會舉死因平舉子仁果遂改
安定郡為涇州天寶元年改為安定郡乾元元年復為涇
州皇朝為彭化軍節度

元領縣五今三

保定靈臺良原

二縣割出

潘原唐未割置
行渭州

臨涇唐未割置
行原州

州境

東西七十里

南北一百三十五里

四至八到

東南至東京一千七百里

東南至西京一千二百五十里

東南至長安四百五十里

東至鳳翔府麟遊縣長安鎮界四十里

西至渭川潘原縣界三十里

西至鳳翔府普潤縣界一百里

北至原州臨涇縣界三十五里

東至鳳翔府麟遊縣界一百四十里

西北至原州臨涇縣界三十里

西南至隴州汧陽縣界九十里
東北至寧州豐義縣界四十里

戶

唐開元戶一萬五千九百五十三

皇朝管戶主一萬二千一百七十一客二千二百九十八

風俗

水土雜于河西人烟接于北地故安定處山谷之間其實
昆戎舊壤迫近夷狄修習武備士則高尚氣略人以騎射
為先蓋與邠隴之俗同爾

姓氏

安定郡四姓長武梁水并席谷間安有三皇甫北也晉太

人物茹妣燕書此野志三水編亂安之野自益可

梁統安定烏氏人為酒泉太守子諫當高而嘆一子繁各

李恂安定臨涇人為兗州刺史嗜氣山并其西今亭明若

張耽安定人好學秦書程卓孝友著名一皇甫謐安定人

土產本各機發水派山氣依西南賦心山下人惡

龍鬚席 羊 馬 駝毛 紅花 麻布 黃耆 地 檀 土

麝香 秦膠 山 雲 水 派 出 南 山 谷 之 間 水 律 前 晉

保定縣 旧三鄉 今本漢安定縣也後漢省後魏文帝大統

元年自高平城移于今理屬安定郡隋開皇三年罷郡

以縣屬涇州唐至德二年改為保定縣。笄頭山一名
崆峒山昔黃帝學道于廣成子是此。彈箏峽自原州
百泉縣界都盧山涇水所出南流山谷之間水聲清響
有如彈箏。振履堆故老云夸父逐日振履于此阜上
○胡盧河本名蔚茹水源出原州西南類沙山下入涇
○烏亭史記云秦惠王取其地置烏氏縣屬安定郡莽
李曰烏亭有烏水出西北入河都盧山在其西今亭即漢
為縣所也。○瓦亭續漢志云烏氏縣有瓦亭一名薄落
亭。三水故城漢書地理志三水縣屬安定郡有益官
亭後漢末盧芳據三水在山谷間魏攻三水即此也晉太

康地志云西川屬安定郡。西王母祠周地圖記云王
母乘五色雲降于漢武其後帝巡郡國望彩雲以祠之
而雲浮五色屢見于此漢書上之。也因立祠焉每
水旱百姓禱祈時有驗焉。左右谷故城在今縣南。
烏氏故城即烏亭也。廢城在今縣東焉。涇川水在
縣南十里從潘源縣來入邠州宜祿。閣川水在縣西
南三里從潘源縣來入涇水。
靈臺縣東一百里元七鄉按梁氏志即漢鶉觚縣地屬北地郡後
魏大統中自鶉觚故城移今所周地圖記云鶉觚縣屬
平涼郡唐天寶元年八月改為靈臺縣理即古密國之

地。○蒲川。鄜道元注水經云。蒲水出南山。蒲谷東北合細川水。又東北流。合且字川水焉。○陰密城。詩曰。密人不恭。春秋左傳。昭公十五年。晉荀偃如周。葬穆后。王曰。叔父唐叔。成王之母弟也。密須之鼓。與其大輅。文所以大蒐也。杜預云。密須。姑姓國也。在安定陰密縣。史記周共王遊于涇上。密康公從。有三女奔之。其母曰。必致之于王。夫獸三為羣。人三為衆。女三為粲。王田不取羣。公行不下衆。王御不參一族。夫粲。美之物也。衆以美物歸汝。而何德以堪之。王猶不堪。况尔小醜乎。小醜備物終必亡。康公不獻。一年共王滅密。密即此城也。○三交川。

水在縣東南五里。亦名三香水。源從麟遊縣。○臥龍原。在縣東十里。○左丘明廟。在縣東北三十里。○牛仙客祖墓。在縣西一里。蒲川水西石關前有碑存。祖贈涇州刺史。父贈戶部尚書。

良原縣

西南六十里。旧三鄉。今七鄉。

本漢三水縣地。屬安定。罷隋大業

元年。分安定。鶉觚二縣之地。置縣。縣西南三十里有良原因以為名。○白石原。其原起自縣西南三十里。東下三十里。分為兩原。南三十里。更名良原。一原東北四十里。更名良。杜原。漢書地理志屬安定縣。○朝那城。後魏大統元年。自原州百泉縣。朝那城徙朝那縣于此。其地

今割入臨涇縣界。望兒原在縣東三十里。

太平寰宇記卷第三十二

[Faded bleed-through text from the reverse side of the page, including characters like '望兒原', '臨涇縣', and '太平寰宇記']

校勘

涇州

保定縣

三水故城

按後漢書盧芳三水人王莽末匈奴立為漢帝吳漢數擊芳不克今記以為後漢末魏改三水皆誤西王母祠上之空也因立祀焉

按上之字下諸本皆空闕王母事漢書所無而武帝嘗幸安定者再今闕文疑是上之幸安定也然無考見又引漢書恐舛誤耳

漢書地理志

帝昔年安食谷在平國文籍其土之幸安或沙洲

將土之字不備本皆與關王長軍史書所無而為

西王母所工之也自立所為

黃帝學者不遠今臨西海其本野河三水皆歸

并身其書與卷三不入王莽本所也之為其也

三水注

新定

西

西

太平寰宇記卷第三十三

關西道九

原州

慶州

原州

原州平涼郡今禹貢雍州之域春秋時其地屬秦至始皇

時屬北地郡漢之安定高平縣地至安帝永初五年避羌

寇移郡寄理今武功縣美陽故城順帝時復還理高平自

移郡人戶稍少至曹魏廢後魏太延二年於今理置高平

鎮至孝明帝正光五年改為原州蓋取高平曰原為名隋

大業三年罷州為平原郡。後陷寇中。唐武德元年，平薛仁
果，復其地為原州。貞觀五年，置都督府，管原慶會寧亭達
要等七州。十年，省亭達要三州，唯督四州。天寶元年，改為
平涼郡。乾元元年，復為原州。自祿山亂後，西戎犯邊，洮蘭
秦隴盡為虜境。貞元七年，涇原節度使劉昌，置於平涼縣。
至元和三年，移於涇州。臨涇縣置行原州。遂命鎮將郝玘
為刺史，始玘以
臨涇地宜蓄息，兩番每為寇。即屯其地，嘗白其帥請城以
控之。前帥不從，其後段佑為節度使，玘復白佑，佑多其策，
乃表請城之。故玘鎮其地，自是西戎無敢犯涇者。玘出自
行間，前無強敵，在邊三十年，里得蕃人，輒剗剔而歸其屍。
番人畏之如神，下令得玘者賞以等身金。大中三年，本道
節度使康季榮，收復關隴，却歸舊原州。唐末，黃巢作亂，復陷

城壁再移原州於臨涇縣置

元領縣四 今一

臨涇 唐末自涇州
以置原州

三縣落番

平高 百泉 平涼

一縣割出

蕭關 置武州後廢
入潘原縣

州境

東西五十五里 南北九十五里

新四至八到

東南至東京一千七百九十里
東南至西京九百四十里
東南至長安五百四十里
東至寧州彭陽縣五十五里
西至當州開邊堡三十里
壕外蕃界
南至渭州潘原縣九十里
北至邠州寧羗縣九十里
東南至涇州保定縣界四十里
西南至當州新城鎮西庵堡蕃界七十里
北至寧羗縣界四十五里
東至彭陽縣界三十四里

唐開元戶八千七十五
皇朝領縣一管戶主三千四百三十六客三千五百四十九
地廣人稀質木不寇盜

皇甫規安定朝那人為度遠將軍
皇甫義貞朝那人少有文武志好詩書
皇甫謐安定人

貢
覆鞍氍 白氈 黃耆 白藥 賦 麻布

臨涇縣

舊十鄉今四鄉

漢舊縣屬安定郡隋大業元年於今縣理

置湫谷縣十二年復為臨涇縣唐貞元十一年涇原帥

劉昌奏自臨涇縣定成堡移於今所元和三年改為行

原縣今復舊名。陽晉小水在縣南一十五里白羅使

堡蕃界來入本州八十里入涇州保定縣界。原州川

水自蕃界來入州界五十五里入寧州彭陽縣界。和

戎原在縣南二十五里唐廣德已前舊縣

平高縣

三鄉

本漢平高縣地理志云屬安定郡後魏太武太

延二年於今縣理置平高縣屬高平郡隋開皇三年罷

郡以縣屬原州大業三年以原州為平涼郡縣仍舊焉

○馬屯山十六國春秋云姚萇與苻登戰於高平登敗

奔於馬屯山是此也。筭頭山一名崆峒山在縣西一

百里史記云黃帝東至於海登丸山西至於崆峒登雞

頭即此山也漢書元頭山在涇陽西禹貢涇水所出淮

南子云薄落山一名筭頭山注水經云蓋大隴山之異

名耳莊子謂黃帝學道於廣成子蓋在此山按今蕭州

又有崆峒山未詳孰是今此見有栢堂在山頂上不知

何代所置後漢隗囂使王孟塞雞頭道即此也。朝那

湫祠史記湫淵祠朝祠蕪林曰湫淵方四十里停水不

流冬夏不增不減至生草木師古曰此水在今涇州界

或誼汚輒興雲雨亢旱每於此求之故有祠存。木峽
關在顏沙山上縣南一百一十里隴山上有隴山關與
此有別。蕭關故城在縣東南三十里漢書文帝十四
年匈奴入蕭關殺北地都尉即此地也漢亦謂之彰關
。瓦亭關在縣南七十里即隴山北垂後漢書隗囂使
牛邯守瓦亭即此也。劉表墓按從征記云劉表冢在
高平郡表子琮擣四方珍香數十石著棺中永嘉中郡人
衛熙發其墓見表貌如生香聞數十里熙懼不敢犯。
唐監牧貞觀中自京師東赤岸澤移馬牧於秦渭二州
之北會州之南蘭州狄道縣之東原州之西置監牧使

以掌其事仍以原州刺史為都監牧使以管四使西使
北使東使

百泉縣東九十里五鄉亦漢朝那縣故地城在今縣理西四十五
里後魏正光五年於今縣西陽晉川置黃石縣廢帝二
年改為長城縣隋大業二年改長城為百泉唐武德八
年移於今理。彈箏峽水水經云涇水經都廬山山路
之內常有如彈箏之聲行者聞之鼓舞而去又云絃歌
之山峽口水流風吹滴崖響如彈箏之韻因名之。涇
水源出縣西南涇谷漢書地理志涇陽縣開頭山禹貢
謂涇水所出水經云涇水出安定涇陽縣高山涇谷

元注云山海經日高山涇水出焉東流注於渭入閼謂之八水。可藍山在縣西南七十里一名都廬山十六國春秋赫連定勝光二年敗於陰盤登可藍山望統萬城泣曰先帝若以朕承大業豈有今日之事俄有羣狐鳴於定旁命射之無所獲

蕭關縣

北百八十里四鄉

本隋他樓縣唐貞觀六年置綠州領突

厥降戶寄治於平高縣界他樓城高宗時於蕭關置他樓縣神龍元年廢他樓縣御史中丞侯全德以去州濶遠奏於故白草軍城置蕭關縣大中五年置武州周顯德五年廢入潘原縣。蔚如水一名胡廬山河源出原

州西南顏沙山中。廢他樓縣本漢高平縣地隋時為他樓縣唐貞觀六年於此置綠州領突厥降戶

慶州

慶州

安化郡今安化縣

禹貢雍州之域古西戎地夏衰后稷子不

窟奔戎翟之間今州理東南三里有不窟故城春秋時為義渠戎之土秦滅之得其地以屬北地郡後漢至晉戎虜侵擾不立郡縣後魏及周以為鎮防故後魏書云大統十一年置為朔州後周廢隋文帝改置合州鎮十年廢鎮十六年割寧州歸德縣置慶州以慶美取其嘉名也煬帝初改州為弘化郡唐武德元年改為慶州領合水樂蟠三泉

馬嶺弘化五縣。五年改三泉為同川縣。六年置總管府。改
合水為合州縣。又置白馬蟠交二縣。七年改總管為都督
府。貞觀元年廢都督府。及合州縣。仍割林州之華池縣來
屬。二年置洛源縣。四年復置都督府。及北永州。以洛源縣
屬北永州。五年又罷都督府。以慶州隸原州都督府。八年
又以廢北永州之洛源縣來屬。開元四年復置都督府。二
十六年升為中都督府。天寶元年改為安化郡。至德元年
改為順化郡。乾元元年改為慶州。今郡城亦名尉李城。在
白馬兩川交口。亦曰不窟城。

元領縣十一

安化

華池

樂蟠

三縣新併合

同川入安化

延慶入安化

合水入樂蟠

五縣舊廢

馬嶺

洛源

方渠

懷安

蟠交

州境

東西二百五十二里

南北四百七十里

四至八到

東南至東京一千八百二十四里

東南至西京一千四百一十四里

東南至長安五百六十四里
東至廊州三百九十里
南至寧州一百二十七里
西至原州三百七十里
北至鹽州五百五十里
東南至廊州三百九十五里
西南至涇州三百二十三里
西北至靈州六百四十里
東北至延州四百五十里

戶

唐開元戶一萬七千九百八十一
皇朝管戶主四千三百九十四客七千五百八十七

風俗

與邠寧略同

人物

傅介子北地人為平樂監刺樓蘭王封義陽侯
甘延壽北地都郵人少以良家子為羽林
傅燮北地人為漢陽太守

土產

胡女布

香子

龍鬚席

牛酥

麝香

安化縣舊二鄉今七鄉本漢都郵縣屬北地郡後漢迄晉戎虜所
侵不立郡縣後魏及周以為鎮防周地圖記云都郵城
今名尉李城在白馬嶺兩川交口即今縣是也注水經
云尉李城亦曰不窟城隋開皇十六年於今州城西南
一里置合水縣屬慶州唐武德元年啟為合州縣貞觀
元年改為弘化天寶元年改為安化至德元年改為順
化皇朝復為安化○白馬水出北塞夷中水經注云洛
川南經尉李城東北合馬嶺水號白馬水合於渭洛北
川與合水縣相接○廢延慶縣本漢都郵縣地柳谷城
後魏於今縣理置朔州隋開皇中改置合水縣唐武德

六年移豐州住戶於此分合水縣置白馬縣以縣臨白
馬川為名天寶元年改名延慶周顯德三年併入安化
縣○子午山亦名橋山○馬嶺山亦名箭括山○寡婦
原白馬川皆在縣界○廢同川縣在州西八十里本漢
都郵之地隋義寧二年分寧州之彭原縣於縣西南十
五里三泉故城置三泉縣屬弘化郡唐武德三年自三
泉故城移於今所為同川縣因同川故城為名皇朝
乾德二年併入安化○劉靈墓在縣北三十里延慶鄉
出舊圖經

華池縣

東一百五十里舊二鄉今四鄉本漢歸德縣之地即洛源縣也西

魏時為華池縣。以隸蔚州。後廢。至隋仁壽二年。於今縣東北二里庫多汗故城。又置華池縣。西有華池水。因舊額為名。屬慶州。大業元年。自庫多汗城移於今所。子午山。舊名翟道山。一謂鷄山水。經云。自烏鷄水出焉。西北注於洛水。

樂蟠縣

南四十里。舊七鄉。今三鄉。

本漢略畔道之地。

漢書縣有蠻夷日道。

又為富

平縣地。後魏迄晉。為虜所侵。無復州縣。後魏大統六年。於此置蔚州。後周建德二年。置北地郡。義寧元年。分合水縣。置樂蟠縣。屬弘化郡。取樂蟠城為名。略畔故城。在縣東北五里。地理志略畔道屬北地郡。富平故城。

在縣西八十里。寧州彭原縣界。富平古城是也。○廢合水縣。在州東五十里。後魏為襄樂縣之地。唐武德六年。分合水縣。置蟠交縣。取蟠交故城為名。天寶元年。改為合水縣。周顯德三年。并入樂蟠。○廢馬嶺縣。在州北七十里。本漢舊縣。屬北地郡。後漢省。馬嶺復為靈州縣之地。後魏為朔州之地。隋大業元年。分合水縣。於此置馬嶺縣。復漢縣之名。以川形似馬嶺為名。按韋述十道錄。與同州懷安方渠等四縣並廢。○馬嶺山。俗名箭括嶺。一與青山相連。亘在縣西一里。有馬嶺坂。左右帶川。相傳漢之牧地也。又有水出縣西北。注水經云。與青山水。

合。靈武城地理志靈武縣屬北地郡。今廢。故城在嶺北。弘州城周武天和四年築。置長城鎮。後改為長川鎮。隋開皇十六年廢鎮立弘州。唐初州廢。秦長城在縣西北一百二十六里。蒙恬所築。廢方渠縣在州北一百八十里。漢舊縣廢。其地入馬嶺縣。至唐景龍元年分馬嶺縣以置焉。因方渠水以為名也。廢懷安縣在州東北一百六十里。隋柳谷城也。居近党項。民無產稅。唐開元十年以檢括逃戶所置。故以懷安為名。廢洛源縣在州東北二百七十里。本漢歸德縣地。屬北地郡。後漢更始二年封岑彭為歸德侯。謂此也。後魏大統元

年復置歸德縣。隋大業元年改為洛源。因洛水所出處為名。白於山在縣北三十里。一名女郎山。山海經云上多松柏。下多檀櫟。獸多牝牛。羝羊。鳥多白鶻。洛水出其陽。東流注於渭。洛水源出縣北白于山。經上郡雕陰縣。秦望山南。過襄樂郡。又東南過馮翊衙縣地也。廢芳池州都督府。寄在慶州懷安縣界。管小州十。靜獯王濮林。尹位。長寶。等州。並党項野利民種落。廢安定州都督府。寄在慶州界。管小州七。党橋。烏西戎州。利州。朱州。還州。廢安化州都督府。寄在慶州界。管小州七。永利州。威州。旭州。莫州。西滄州。儒州。琮州。已上五州。並

唐朝所置今廢

太平寰宇記卷第三十三

太平寰宇記卷第三十三... 新平郡... 漆沮之水... 漆沮之水在焉... 漆沮之水在焉... 漆沮之水在焉...

太平寰宇記卷第三十四

關西道十

邠州

寧州

邠州

邠州新平郡理禹貢雍州之城古西戎之地本周公劉所

居故詩謂豳國幽字同公劉卒子慶節復立於此古顓頊之

墟秦併屬內史漢為右扶風北地安定三郡地後漢興平

元年分安定之鶉觚右扶風之漆置新平郡理漆縣徐廣

注漢書云新平漢之漆縣地以漆沮之水在焉縣東北有

古邠亭即古之邠邑也。歷魏晉同之。晉武帝分漆縣置幽
邑縣。苻秦時改漆取郡名為新平縣。姚萇亂郡縣俱廢。後
魏大統十四年分涇州之新平縣置南幽州。以北別有幽
此為南廢帝三年廢北幽州。此遂去南字。後周因之。隋開
皇三年於今州西南十里陳陽原上移白土縣入州城中。
四年又改為新平縣。大業二年省幽州以縣屬寧州。其年
又改寧州為邠州。三年改幽州為北地郡。以其地屬安定
北地二郡。至義寧二年割北地郡之新平三泉二縣置新
平郡。復後漢末舊名。唐武德元年改為幽州。復西魏舊名。
二年分新平置永壽縣。貞觀二年又分新平置宜祿縣。開

元十三年以幽與幽字相涉改為邠字。天寶元年改為新
平郡。乾元元年復為邠州。皇朝為靜難軍節度。

西北至元領縣五今四

東南至新平三水宜祿定平寧州割到

西至長壽州人乾州長壽州境百八十里

東西二百里

南北一百二十里

四至八到

東至東京一千五百三十二里

東南至西京一千一百三十二里

東北至長安二百八十二里若至奉天縣一百三十里

東至坊州二百二十五里

北至寧州一百九十里

西至涇州一百九十里

西南至鳳翔府一百六十二里

東南至坊州三百一十五里

西北至涇州三百一十五里

戶

唐開元戶一萬九千四百六十一

皇朝管戶主一萬四千一百一十二客五千七百八十五

風俗

漢書云公劉處豳其人有先王遺風好稼穡務本業故豳詩言農桑衣食之本甚備焉其俗尚勇力習戰備居戎狄處勢使之然天水隴西安定頗同也

姓氏

新平郡三姓

古附異

人物

李育習公羊春秋為同郡班固所重為尚書令

唐侯君集三水人上將軍反伏誅

土產

蜜 蠟 麻布 羊 馬 麀 鹿

鐵器 漢於漆縣置鐵官 甘草 貢剪刀 火筋 菓豆

新平縣 舊十七鄉今七鄉 本漢漆縣屬右扶風建武八年隗囂悉

衆攻畧陽上至漆進止未定會馬援夜至上喜問之據

聚米以為山谷上前指軍所從入上笑曰膚在吾目中

遂進兵姚萇之亂郡縣不立後魏於今縣西南至白土

縣屬新平郡隋開皇三年罷郡於今城中置豳州四年

改白土縣為新平縣唐武德元年以新平縣又為豳州

縣屬焉。五龍原原側有五泉出水因以為名。○漆水

按鄜元注水經云漆水自宜祿界來又東過扶風漆縣

北以水經驗之即邠州所理是也漢志注云漆水在縣

西今縣西九里有白土川水東北流白土原東陳陽原

西又東北流注於涇水或恐白土水是漢之漆水但古

今異名耳今鳳翔府東北一百六十里麟遊縣東南亦

有一漆水南流與枉陽水合非漢之漆水也故舉此以

名之。爰得城漢書地理志云爰得縣屬安定郡後漢

省即此城也。○苻堅墓十六國春秋苻堅建元二十一

年堅至武將山姚萇將吳忠圍堅堅衆奔散神色自若

召宰人進食俄而忠至執堅以歸新平幽之萇求傳國
璽於堅曰萇次膺符歷可以為惠堅瞋目叱之曰小羌
乃敢逼天子豈以傳國璽授汝羌耶圖緯符命何所依
據五胡次序無汝羌名璽已送晉不可得也萇乃縊堅
於新平佛寺時年四十八。橐邱堡在縣西十八里東
西南三面石坡峭峻高十丈北面築城高二丈唐武德
二年置貞觀元年廢。

三水縣

東北六十里舊十鄉今十二鄉

漢舊縣屬安定郡以縣界有羅

川谷三泉並流為名今縣東北二十五里邠邑原上有
柁邑故城即漢理所魏改三水縣為西川縣仍舊屬後

魏初于今縣西二十八里置三水縣復漢舊名屬新平
郡大統十四年移縣於今邠州西北十五里白馬堡隋
開皇三年移理於今邠州三里新平故郡城大業元年
自故郡城移於今理唐武德元年以新平郡為幽州三
水縣屬焉元和十二年移縣於隴堡下舊城初大歷中
吐蕃焚縣城又移隄上後人民不便為邠帥郭釗所請
復移下之。三水出寧州羅川谷有三水並經郡界。
馬嶺山俗名箭筈嶺底慶州界有馬嶺水出焉。翟道
山一名千子山。華池女郎山並在郡邑。浴源浴水
源出女郎山。石門山王褒雲陽宮記東北有石門山

岡巒糾紛干霄秀出有石巖容數百人甘泉賦云封巒
石関施靡辱延屬。○栒邑故城在縣東二十五里即漢
栒邑屬右扶風有幽鄉應劭注云左氏傳畢原鄆郇文
之昭也荀侯賈伯伐晉是也漢為縣。○古幽地在縣西南
三十里有古幽城在龐川水西蓋古公劉之邑即此城
也國都城記幽國者后稷之曾孫曰公劉始都焉幽谷
名焉與故栒邑城相去約五十餘里漢志注云幽鄉是
宜祿縣西八十里
依舊八鄉本漢鶉觚縣也周地圖記云後魏孝明
帝熙平二年鶉觚縣置東陰盤縣廢帝元年以縣南臨
宜祿川又改為宜祿縣屬趙平郡隸涇州。○鶉觚源一

名淺水泉。○宜祿川水一名芮水西自涇川鶉觚縣界
流入周禮職方氏雍州其川注内注水經云内水又東
經宜祿川俗謂之宜祿川水。○芹川注水經云出羅山
縣千子山山一名千子嶺東流經宜祿縣北過即此水
也。○廢鶉觚縣在縣四十里按周地圖記云鶉觚縣者
秦使太子扶蕪及蒙恬築長城見此原高水淺因欲築
城遂以觚爵奠祭乃有鶉鳥飛升觚上以為靈異因以
名縣漢書地理志云後漢永建四年屬涼州石勒改為
趙平郡建武十年涇州東南置趙平郡此縣遂廢。○廢
陰盤縣西北按漢書武帝元鼎元年立陰盤縣屬涼州

徙於新豐其縣遂廢。折塢城唐武德元年薛舉寇涇州屯兵於新安縣折塢城太宗親征相守六十餘日會舉死其子仁果統其衆并羌胡十餘萬來挑戰上遣總管龐玉自淺水原南出賊之右因高而陣上率大兵自原北出其不意斬首萬級餘賊大潰仁果懼而請降俘其精兵萬餘人男女五萬口故城猶在今縣北五里。長武城在縣西五十里隋開皇中築在涇河南岸唐武德初廢大歷初郭子儀置兵以備西戎。廢淺水縣在縣北五里後魏大統十四年廢。

定平縣北六十里舊本漢泥陽之地後漢不改又為獨樂四鄉今六鄉

縣今縣東北三十里獨樂故城也後魏及周並為安定郡隋大業十年於此築城置棗社驛唐武德二年於驛城分置定平縣仍移於今所唐末喪亂會為衍州周世宗顯德五年廢為安平縣隸於邠州尋為屬寧州皇朝又隸邠州。五柞亭續漢書云泥陽縣有五柞亭是也。

寧州

寧州彭源郡今理定安縣禹貢雍州之域古西戎地公劉邑也周時為義渠戎國史記匈奴傳曰夏道衰而公劉失其稷官竄於西戎邑於邠至秦穆公得由余而西戎八國服於秦岐梁

山澧漆之地有義渠大荔烏氏胸行之戎在此地其後義渠之戎築城以自守而秦稍吞食至於惠王拔義渠二十五城秦昭王時殺義渠戎王於甘泉遂起兵伐殘義渠於是秦有隴西北地上郡即築長城以備胡秦本紀惠文君十一年縣義渠暨秦并天下是為北地郡漢為泥陽縣之地亦為北義上郡二郡之地後漢兼屬安定按顧野王輿地志云漢末北地郡但有泥陽富平二縣魏晉亦然西晉愍帝時陷入劉聰郡縣之名所不詳悉按後魏書地形志云皇興二年於今州郭置華州至太和十一年改為班州以班師振旅取其郡名十四年改為邠州二十年改邠為

幽取古地名也至廢帝三年改幽州為寧州以安寧取稱之也後周分置趙興郡隋初因之至煬帝又改為幽州尋廢幽州改趙興郡為北地郡義寧元年領定安羅川襄樂彭原新平三水六縣二年分定安置歸義縣以新平三水屬新平郡唐武德元年改北地郡為寧州其年以彭原縣屬彭州三年分彭原置豐義縣屬彭州又分安置定平縣貞觀元年廢彭州以彭原豐義二縣來屬仍於寧州署都督府十七年廢歸義縣天寶元年改為彭原郡乾元元年復為寧州

元領縣六

今五

安定 彭原 貞寧 襄樂 豐義

一縣割出

定平州

州境

東西二百一十六里 南北一百五十四里

東南至東京一千八百里 西至涇州一百四十二里

東南至西京一千三百一十四里 東至坊州三百二十五里

南至邠州一百四十二里 西至涇州一百七十三里

北至慶州一百二十七里 東南至坊州三百三十里

西南至涇州一百八十里 西北至涇州臨涇縣二百三十三里

東北至廊州直羅縣三百八十九里

唐開元戶二萬二千二十八

皇朝戶主一萬一千一百四十八客六千八百三十三

風俗

同邠州

人物無

卷三十四

九

土產

亦同邠州尤有草豆寇

白蜜

防風充貢

定安縣

舊九鄉今八鄉

本漢泥陽縣地後漢為富平縣後魏太武

真君二年置定安縣在今縣理西北三里隋開皇三年

移於今理仍舊屬寧州○扶蕪冢秦太子冢在嵩城

原○洛水按水經云一名馬嶺川水酈元注云洛水又

南經栒邑故城北與新陽合○珊瑚谷水水經云珊瑚

水東南至栒邑入洛○九陵水出慶州華池縣界千子

山川中有九堆似陵故謂之九陵水○函寧在郡西班

叔皮賦云至於函寧

彭原縣

西北一百里舊本漢彭陽縣地後漢又為富平縣

地後魏破赫連定後於此復為富平縣廢帝改為彭陽

縣屬西北地郡隋開皇三年罷郡以縣屬寧州十八年

改為彭原縣因彭池為名原在郡西○富平故城後漢

富平縣今廢○天固堡隋置在縣南甚險固

真寧縣

東南八十里

本漢陽周縣地屬上郡陳餘與章邯書

曰蒙恬為秦將北逐戎人開榆中地數千里竟斬陽周

謂此縣也後魏置泥陽惠陟二護軍孝文復置陽周縣

隋改為羅川縣因縣南羅水為名屬寧州天寧元年改

為真寧縣○橋山一名子午山在縣東八十里○黃帝

冢在橋山上。漢志上郡陽周縣橋山有黃帝冢。皇覽冢墓記黃帝葬橋山。史記漢武北巡朔方，勒兵十餘萬，還祭黃帝於橋山上，曰：吾聞黃帝不死，今有冢，何也？或對曰：黃帝已僊上天，群臣葬其衣冠於此。羅川水自彭原縣界流入，入曰羅川水。出羅山。○大陵水注水經云：大陵小陵水出，巡和南殊川西南，經寧陽城。故函詩云：夾其皇澗。陵水即皇澗也。○通聖觀唐開元二十三年八月，玄宗夢群仙現於羅底，乃詔訪焉。於彭原羅川縣東王堡村底冢庄有一老人，引使者至洞口，見一白兔入穴，遂掘得二十七仙，並玉石之像，各題名姓得道去。

處并老人亦一仙之數，以應二十八宿，仍於本縣置觀曰通聖，別塑真容，改縣曰真寧。○要冊湫皇朝太平興國二年封真寧縣界要冊湫晉濟王為顯聖王。

襄樂縣

東八十里舊二鄉今四鄉

漢襄洛縣地，屬上郡。後魏孝文帝改洛

為樂縣，城本後魏燕州城也。周地圖記云：文帝大統十六年置燕州，因築此城。後周屬北地郡。隋廢州而縣屬寧州。○大延水注水經云：大延小延水出油水南，延溪西南流，經襄樂縣南，於延城西，二水合流。○油水水經云：油水與追諸川水並出東翟道山，亦襄樂界。


彭陽縣

西八十里舊二鄉今三鄉

本漢彭陽縣地，後魏於縣理置雲州。

周武帝保定二年廢州為防隋文帝廢防為豐義城唐
武帝二年分彭原縣為置義縣屬彭州貞觀元年廢州
以縣屬寧州其城即後魏雲州城也開元八年四月割
隸涇州尋復屬寧州 皇朝開寶九年改為彭陽縣

太平寰宇記卷第三十四



文政三酉

